





天文略第一

天文序

堯命羲和揭星鳥星火星虛星昴之象以示人使人  
知二至二分以行四時不幸而占候之說起持吉凶  
以惑人紛紛然務爲妖妄是以刑網禁之臣謹按占  
候之學起於春秋戰國其時所謂精於其道者梓慎  
裨竈之徒耳後世之言天者不能及也魯昭公十七  
年冬有星孛于大辰西及漢裨竈言於子產曰宋衛  
陳鄭將同日火若我用瓘斝玉瓚鄭必不火子產弗  
與明年五月壬午四國皆火裨竈曰不用吾言鄭又



將火鄭人請用之子產復弗與子太叔咎之曰寶以保民子何愛也子產曰天道遠人道邇竈焉知天道是亦多言矣豈不或信卒弗與亦不復火昭公二十四年五月乙未朔日有食之梓慎曰將水昭子曰旱也日過分而陽猶不克克必甚能無旱乎是秋大旱如昭子之言夫災旱易推之數也慎竈至精之術也而或中或否後世之愚瞽若之何而談吉凶知昭子之言則知陰陽消長之道可以理推不可以象求也知子產之言則知言而中者亦不可聽況於不中者乎臣之所作天文書正欲學者識垂象以授民時之

意而杜絕其妖妄之源焉聊舉二條以爲證臣舊作圖譜志謂天下之大學術者十有六皆在圖譜無圖有書不可用者天文是其一也而歷世天文志徒有其書無載象之義故學者但識星名不可以仰觀雖有其書不如無也隋有丹元子者隱者之流也不知名氏作步天歌見者可以觀象焉王希明纂漢晉志以釋之唐書誤以爲王希明也天文藉圖不藉書然書經百傳不復訛謬縱有訛謬易爲考正圖一再傳便成顛錯一錯愈錯不復稽尋所以信圖難得故學者不復識星臣向嘗盡求其書不得其象又盡求其



通志天文卷一  
圖不得其信一日得步天歌而誦之時素秋無月清  
天如水長誦一句凝目一星不三數夜一天星斗盡  
在胷中矣此本只傳靈臺不傳人閒術家秘之名曰  
鬼料竅世有數本不勝其訛今則取之仰觀以從稽  
定然步天歌之言不過漢晉諸志之言也漢晉志不  
可以得天文者謂所載者名數災祥叢雜難舉故也  
步天歌句中有圖言下見象或約或豐無餘無失又  
不言休祥是深知天者今之所作以是爲本舊於歌  
前亦有星形然流傳易訛所當削去惟於歌之後採  
諸家之書以備其書云

東方

角兩星南北正直著中有平道上天田總是黑星兩  
相連別有一鳥名進賢平道右畔獨淵然最上三星  
周鼎形角下天門左平星雙雙橫於庫樓上庫樓十  
星屈曲明樓中五柱十五星三三相著如鼎形其中  
四星別名衡南門樓外兩星橫

角二星十二度爲主造化萬物布君之威信謂之  
天闕其閒天門也其內天庭也故黃道經其中七  
曜之所行也其星明則太平芒動則國不寧日食  
右角國不寧月食左角天下道斷金火犯有戰敵



通志卷之四十一  
金守之大將持政左角爲天田爲理主刑其南爲  
太陽道五星犯之爲旱右角爲將主兵其北爲太  
陰道五星犯之爲水蓋天之三門猶房之四表也  
左右角閒二星曰平道爲天子八達之衢明正則  
吉動搖則法駕有虞天田主天子畿內封疆金守  
之主兵火守之主旱水守之主潦平道西一星曰  
進賢在太微宮東明則賢者在位暗則在野又曰  
主卿相舉逸才周鼎三星在攝提西國之神器也  
不見或移徙則運祚不寧天門二黑星在平星北  
角之南主天之門爲朝聘待客之所明則四方歸

化不見則兵革起邪佞生平星一星在庫樓北平  
天下之法獄廷尉之象也庫樓十星其六大星爲  
庫南四星爲樓在角南一曰天庫兵車之府也旁  
十五星三三而聚者柱也中央四小星衡也主陳  
兵其占曰庫中星不見兵四合無星則下臣謀上  
明而動搖則兵出四方盡不見則國無君庫樓東  
北二星曰陽門主守隘塞也南門二星在庫樓南  
天之外門也主守兵明則遠方入貢暗則夷狄畔  
客星守之主兵至

亢四星恰如彎弓狀大角一星直上明折威七子亢



通志卷之四十一  
四  
下橫大角左右攝提星三三相相似如鼎形折威下左  
頓頑星兩箇斜安黃色精頑下二星號陽門色若頓  
頑直下踣

亢四星九度日月之中道主天子內朝天下之禮  
法也又曰總攝天下奏事聽訟理獄錄功者也亦  
爲疏廟主疾疫其星明大四海歸王輔臣納忠人  
無疾疫移動多病不見則天下鼎沸而旱澇作矣  
大角一星在攝提閒天王坐也又爲天子梁棟金  
守之則兵起日月食主凶亢南七黑星曰折威主  
斬殺金火守之夷狄犯邊將有棄市者攝提六星

直斗杓之南主建時節伺機祥攝提爲盾以夾擁  
帝坐也主九卿明大三公恣橫客星入之聖人受  
制一曰大臣之象頓頑二星在折威東南主考囚  
察情僞也陽門在庫樓東北主邊塞險阻之地客  
星出陽門夷狄犯邊

氏四星似斗側量米天乳氏上黑一星世人不識稱  
無名一箇招搖梗河上梗河橫列三星狀帝席三黑  
河之西亢池六星近攝提氏下衆星騎官出騎官之  
衆二十七三三相連十欠一陣車氏下騎官次騎官  
下三車騎位天輻兩星立陣傍將軍陣裏振威霜



氏十六度下二尺爲五星日月中道爲天子之路  
寢明則大臣妃后奉君不失節如不見或移動則  
臣將謀內禍亂生矣日月食主內亂木犯之立后  
妃火犯臣僭上金犯拜將水犯百官憂客星犯婚  
禮不整彗孛犯暴兵起月暈人不安一曰氏爲后  
妃之府休解之房前二星適也後二星妾也將有  
徭役之事氏先動星明大則民無勞天乳在氏北  
主甘露明則潤澤甘露降招搖一星在梗河北次  
北斗柄端主胡兵芒角變色搖動則兵革大起梗  
河二星在大角北天子以備不虞其色變動有兵

喪帝席三星在大角西北天子宴樂獻壽之所其  
星不見大人失位亢池六黑星爲汎舟楫主迎送  
移徙則凶騎官二十七星在氏南天子騎士之象  
星衆則安不見兵起車騎三黑星在氏南騎官之  
上都車馬之將也金火犯爲災動搖車騎行天輻  
兩黃星在房西主鑾駕客星來守之則輦轂有憂  
也騎陣將軍一星在騎官東南主騎將也搖動則  
騎將出

房四星直下主明堂鍵閉一黃斜向上鈎鈐兩箇近  
其傍罰有三星植鍵上兩咸夾罰似房狀房下一星



通志卷之四十一  
號爲日從官兩箇目下出

房亦度爲明堂天子布政之宮也亦四輔也下第四星上將也次次將也次次相也上星上相也南二星君位北二星夫人位又爲四表中閒爲天衢之大道亦謂之天闕黃道之所經也南閒曰陽環亦曰陽道其南曰太陽北閒曰陰閒亦曰陰道其北曰太陰七曜由乎天衢則天下平和由陽道則主旱喪由陰道則主水兵房星亦曰天駟爲天馬主車駕南星曰左驂次左服次右服次右驂亦曰天廐又主開閉爲蓄藏之所由也房星明則王者

明驂星大則兵起星離則人流日月食主昏亂權臣橫彗孛犯之兵起下二星爲陰五星犯之爲水上二星爲陽五星犯之爲旱房北二小星曰鈞鈐房之鈐鍵天之管籥主閉藏鍵天心也王者孝則鈞鈐明近房天下同心遠則天下不和王者絕後房鈞鈐閒有星及踈坼則地動河清東咸西咸各四星在房心北日月五星之道也爲房之戶所以防淫佚也明則吉暗則凶日月五星犯守之有陰謀火守之兵起罰三星在東咸正西南北而列主受金贖罪正而直列則法令太平曲而斜列則刑



通志卷之四十一  
七  
罰不中日一星在房中道前太陽之精主明德金  
火犯守之有憂從官二星在積卒西北

心三星中央色最深下有積卒共十二三三相聚心  
下是

心六度一名大火天王位也中星曰明堂爲大辰  
天子之正位也前星爲太子不明則太子不得位  
後星爲庶子明則庶子繼心上四尺爲日月五星  
之中道中心明則化成道昌直則地動移徙不見  
國亡又曰心變黑色大人有憂直則主失勢動則  
國有憂離則民流金火犯血光不止土木犯吉日

月食吉月暈兵起火來守之國無主客星及孛犯  
天下兵荒積卒十二星在房心西南五營軍士也  
微而小則吉明大動搖兵大起一星亡兵出二星  
亡兵半出三星亡兵出盡他星守之兵大起近臣  
誅

尾九星如鉤蒼龍尾下頭五點號龜星尾上天江四  
橫是尾東一箇名傳說傳說東畔一魚子龜西一室  
是神宮所以列在后妃中

尾十九度后妃之府後宮之場也北之一丈爲天  
之中道上第一星后也次三星夫人次則嬪妾第



三星傍一星名曰神宮解衣之內室尾亦爲九子  
星色欲均明大小相承則后妃無妬忌後宮有敘  
多子孫星微細暗后有憂疾疎遠則后失勢動移  
則君臣不和天下亂就聚則大水木犯之及月暈  
則后妃死火犯宮中內亂土犯吉水犯宮中有事  
客星犯大臣誅日月食主飢一曰金火守之後宮  
兵起龜五星在尾南漢中主占定吉凶明則君臣  
和不明則爲乖戾亡則赤地千里火守之兵起在  
外守之則兵罷天江四星在尾之北主太陰不欲  
明明而動水暴出參差則馬貴其星不具則津河

關道不通熒惑守之有立主客星入河津絕傅說  
一星在尾後河中主後宮女巫祀祀神靈祈禱子  
孕故曰主王后之內祭祀以求子孫詩云克禋克  
祀以弗無子此之象也其星明大王者多子孫小  
而暗後宮少子動搖則後宮不安星搖則天子無  
嗣魚一星在尾後河中主陰事知雲雨之期也大  
明則陰陽和風雨時暗則魚多亡動搖則大水暴  
出出漢中則大魚多死火守在南則旱在北則水  
起

臣謹按傅說一星惟主後宮女巫禱祠求子之事



謂之傳說者古有傅母有保母傅而說者謂傅母喜之也今之婦人求子皆祀婆神此傳說之義也偶商之傳說與此同音諸子百家更不詳審其義則曰傳說騎箕尾而去殊不知箕尾專主后宮之事故有傳說之佐焉

箕四星形狀如簸箕箕下三星名木杵箕前一黑是糠皮

箕十一度亦謂之天津後宮妃后之位上六尺爲天之中道箕一曰天雞主八風凡日月宿在箕東壁翼軫者風起又主口舌主客蠻夷胡貊故蠻夷

將動先表箕焉星大明直則五穀熟君無讒閒疎暗則無君世亂五穀貴蠻夷不伏内外有差就聚細微天下憂動則蠻夷有使來離徙則人流若移入河國災人相食月暈金火犯之兵起流星犯大臣叛日宿其野風起杵三星在箕南主杵春之用也縱爲豐橫爲飢移徙人失業不見人相食客星入杵曰天下有急變糠一星在箕口前杵曰西北明則爲豐暗則爲飢不見人相食

### 北方

斗六星其狀似北斗魁上建星三相對天弁建上三



通志天文略一  
三九斗下圓安十四星雖然名鼈貫索形天雞建背  
雙黑星天籥柄前八黃精狗國四方雞下生天淵十  
星鼈東邊更有兩狗斗魁前農家丈人狗下眠天淵  
十黃狗色玄

斗二十五度天廟也亦曰天機五星貫中日月正  
道爲丞相太宰之位酌量政事之宜褒進賢良稟  
授爵祿又主兵南二星魁天梁也中央二星天相  
也北二星天府庭也亦爲壽命之期將有天子之  
事占於南斗星盛明君臣一心天下和平爵祿行  
芒角動搖天子愁兵起移徙其臣逐日月五星逆

入斗天下流蕩孛犯之兵起星小暗則廢宰相及  
死鼈十四星在南斗南鼈爲水蟲爲太陰有星守  
之白衣會主有大水火守之早建六星在斗背亦  
曰天旗臨於黃道天之都關也建斗之間七曜之  
道建爲謀事爲天鼓爲天馬南二星天庫也中央  
二星市也鈇鑕也上二星旗跗也建動搖則人勞  
月暈之蛟龍見牛馬疫月食五星犯守大臣相譖  
臣謀主亦爲關梁不通有大水天弁九星在建星  
北入河中市官之長也主列肆闐闐若市籍之事  
以知市珍也星明則吉彗星犯守之糴貴兵起天



雞二星在狗國北主候時也金火守入兵大起天  
籥八星在斗南斗杓西主鑠籥關閉明吉暗凶狗  
國四星在建東北主鮮卑烏丸沃沮明則邊寇作  
金火犯守外夷有變太白逆守之其國亂客星守  
犯之有大盜其王且來天淵十星在鼈東南一曰  
天海主漑灌火守之大旱水守之大水一曰主海  
中魚鼈狗二黑星在斗魁前主吠守禦姦回也不  
居常處爲大災農丈人一星在南斗西南老農主  
稼穡也其占與糠略同

牛六星近在河岸頭頭上雖然有兩角腹下從來欠  
一脚牛下九黑是天田田下三三九坎連牛上直建  
三河鼓鼓上三星號織女左旗右旗各九星河鼓兩  
畔右邊明更有四黃名天桴河鼓直下如連珠羅堰  
三烏牛東居漸臺四星似口形輦道東足連五丁輦  
道漸臺在何許欲得見時近織女

牛七度天之關梁日月五星之中道主犧牲其北  
二星一曰卽路一曰聚火又曰上一星主道路次  
二星主關梁次三星主南越甘氏曰上二星主道  
路次二星主關梁次二星主南夷中一星主牛移  
動則牛多殃明大則王道昌其星曲則糴貴又曰



星明大則關梁通牛貴怒則馬貴不明失常穀不  
登細則牛賤中星移上下牛多死小星亡則牛多  
疫月暈損犢金火犯之兵災水土犯之吉天田九  
星牽牛南太微東主天子畿內之田其占與角之  
天田同九坎九黑星在天田東主溝渠所以道達  
泉源流瀉盈溢明盛則有水災夷狄侵邊不明則  
吉河鼓三星在牽牛北天鼓也主軍鼓及鈇鉞一  
曰三武主天子三將軍中央大星爲大將軍左星  
爲左將軍右星爲右將軍左星南星也所以備關  
梁設險阻而拒難也明大光潤將軍吉動搖差度

亂兵起直則將有功曲則將失律左旗右旗各九  
星在河鼓左右皆天之旗鼓也旗星明潤將軍吉  
動搖兵起怒則馬貴旗端四星南北列曰天桴鼓  
桴也星不明漏刻失時動搖軍鼓用桴鼓相直亦  
然織女三星在河北天紀東端天女也主果蓏絲  
綿珍寶也王者至孝神祇咸喜則織女星俱明天  
下和平大星怒角布帛貴又曰三星俱明女功善  
暗而微天下女功廢不見兵起東足四星曰漸臺  
臨水之臺也主刻漏律呂之事西足五星曰輦道  
天子嬉遊之道金火守之御路兵起羅堰三星在



牽牛東主隄塘壅蓄水潦灌溉田苗大而明大水  
泛溢

臣謹按張衡云牽牛織女七月七日相見者卽此  
也爾雅云河鼓謂之牽牛又歌曰東飛百勞西飛  
燕黃姑織女時相見黃姑卽河鼓也音訛耳

女四星如箕主嫁娶十二諸國在下陳先從越國向  
東論東西兩周次二秦雍州南下雙雁門代國向西  
一晉伸韓魏各一晉北輪楚之一國魏西屯楚城南  
畔獨燕軍燕西一郡是齊隣齊北兩邑平原君欲知  
鄭在越下存十六黃星細區分五箇離珠女上星敗

瓜珠上瓠瓜生兩箇各五瓠瓜明天津九箇彈弓形  
兩星入牛河中橫四箇奚仲天津上七箇仲側扶筐  
星

女十一度下九尺爲日月中道天之少府也謂之  
須女者須賤妾之稱婦職之卑者也主婦女之位  
其星如婦功之式主布帛裁製嫁娶星明天下豐  
女功昌小暗則國藏虛移動則嫁女受殃產死者  
多后妃廢日月食國憂木犯立后火犯女喪金犯  
災土孛犯損蠶月暈婦人災又曰水守之萬物不  
成火守之布帛貴人多死土守之有女喪金守之



通志天文略一  
兵起十二國有十六星齊一星在九坎之東齊北  
二星曰趙趙北一星曰鄭鄭北一星曰越越東二  
星曰周周東南北列二星曰秦秦南二星曰代代  
西一星曰晉晉北一星曰韓韓北一星曰魏魏西  
一星曰楚楚南一星曰燕其星有變各以其國離  
珠五星在須女北須女之藏府也爲女子之星非  
其故後宮亂客星犯之後宮凶瓠瓜五星在離珠  
北主陰謀主後宮主果食明則歲熟微則后失勢  
瓜果不登客星守之魚鹽貴芴五星曰敗瓜主種  
植與瓠瓜略同天津九星在虛危北橫漢中津梁  
所度明而動則兵起如流沙死人如亂麻參差不  
齊馬貴一星不備關梁不通三星不備覆陷天下  
星亡水災河溢水賊稱王奚仲四星在天津北古  
車正也金火守之兵車必起扶筐七黑星主蠶事  
見吉不見則凶

臣謹按天之所覆者廣而華夏所占者牛女下十  
二國耳牛女在東南故釋氏謂華夏爲南瞻部洲  
其二十八宿所管者多十二國之分野隨其所隸  
耳

虛上下各一如連珠命祿危非虛上呈虛危之下哭



泣星哭泣雙雙下壘城天壘團圓十三星敗曰四星  
城下橫曰西三箇離瑜明

虛九度少疆冢宰之官也主邑居廟堂祭祀之事  
又主風雲死喪下九尺爲天之中道明靜則天下  
安動搖則有死喪哭泣日月食兵起流星犯賊亂  
宗廟五星犯有災虛北二星曰司命主舉過行罰  
滅不祥又北二星曰司祿主爵祿增年延德故在  
六宗之祀司危二星在司祿之北主矯枉失司非  
二星在司危之北主察愆過凡此四司皆黑星明  
大爲災居常則平虛南二星曰哭主號哭也哭東

二星曰泣主死明則國多哭泣金火守之亦然泣  
南十三星曰天壘城如貫索形主北夷丁零匈奴  
敗曰四星在虛危南知凶災他星守之飢兵起秦  
代東三星南北列曰離瑜離袿衣也瑜玉飾皆婦  
人之服也星微則後宮儉約明大則婦人奢

危三星不直舊先知危上五黑號人星人畔三四杵  
曰形人上七烏號車府府上天鈞九黃晶鈞上五鷗  
字造父危下四星號墳墓墓下四星斜虛梁十箇天  
錢梁下黃墓傍兩星能蓋屋身著黑衣危下宿

危十六度主天府曰天市主架屋甘氏云爲天市



通志天文略一  
廟堂下九尺爲天之中道主架屋受藏風雨墓墳  
祠祀如動則天下大動土功張衡云虛危等爲死  
喪哭泣之事亦爲邑居廟堂祠祀之事冢宰之官  
動則死喪哭泣火守則天子將兵金守則飢饉兵  
起虛危動則有土功火守則兵起水守則下謀上  
一云危動而不明土功兵革起月暈日月五星犯  
即有災車府東南五黑星曰人星有如人象主靜  
衆庶柔遠能邇一曰臥星主防淫不見則人有詐  
行詔書明則人安暗凶內杵三星在人星傍主軍  
糧正直下曰吉不相當糧絕不直民飢內曰四星

在人星東南主春曰覆則大飢仰則大豐隋志云  
客星入杵曰兵起天下聚米天津東南七星曰車  
府東近河邊抵司非主官車之府金火守之兵車  
大動天鈎九星如鈎狀在造父西河中主乘輦服  
飾法式直則地將動明則服飾正也傳舍南河中  
五星曰造父御官也一曰司馬或曰伯樂星亡馬  
大貴明則吉墳墓四星在危下如墓形主喪葬之  
事明則多死亡虛梁四星在蓋屋南主園陵寢廟  
非人所處故曰虛梁金火守入犯兵災大起天錢  
十星在北落西北主錢帛所聚星明則府藏盈不



爾虛耗金火守之兵盜起蓋屋二星在危南主天子所居室亦爲宮室之官金守之國兵起彗孛尤甚也

室兩星上有離宮出遶室三雙有六星下頭六箇雷電形壘壁陣次十二星十二兩頭大似升陣下分布羽林軍四十五卒三爲群壁西四星多難論子細歷歷看區分三粒黃金名鈇鉞一顆真珠北落門門東八魁九箇子門西一宿天網是電傍兩黑土公吏騰蛇室上二十二

室十七度亦謂之營室甘氏云爲太廟天子之宮

也石氏謂之玄宮一曰清廟又爲軍糧之府及土功事星明國昌小不明祠祀鬼神不享國多疾疫動則有土功兵出野離宮六星兩兩居之分布室壁之閒天子之別宮也主隱藏休息之所金火守入則兵起室南六星曰雷電主興雷動蟄明或動則震雷作壁陣十二星在羽林北橫列營室之南羽林之垣壘也星衆而明則安寧希而動則兵革起不見天下亂五星入天軍皆爲兵起金火水尤甚羽林四十五星三三而聚散在營室之南天軍也主軍騎又主翼主也星衆而明則安寧希而動



則兵革起不見天下亂金火水守入兵起斧鉞三星亦曰斧鑕在八魁西北主誅夷不明則斧鑕不用移動則兵起有星入之皆爲大臣誅北落師門一星在羽林西南天之蕃落也亦曰天軍蕃之候門長安北門曰北落門以象此也主非常以候兵明大則軍安微弱則兵起金火守之有兵災一曰有星守之虜入塞北落東南九黑星曰八魁主張捕禽獸之官也客星入之多盜賊兵起金火入亦然北落西南一星曰天綱主武帳天子游獵之所會金火守兵起室西南二星曰土功吏主土功之

官也動搖則有修築之事隋志土功吏主司過度騰蛇二十二星在營室北若盤蛇之狀居於河濱謂之天蛇星主水蟲微則國安明則不寧移南大旱移北大水客星守之水雨爲災水物不收

壁兩星下頭是霹靂霹靂五星橫著行雲雨次之口四方壁上天廡十圓黃鈇鑕五星羽林傍

壁九度下九尺爲天之中道主文章天下圖書之秘府也亦主土功明則圖書集道術行小人退君子進星失色大小不同天子重武臣賤文士圖書隱親黨回邪用星動則有土功離徙就聚爲田宅



事日月食損賢臣五星孛犯兵起土功西南五星  
曰霹靂主興雷奮擊明而動用事不明凶霹靂南  
四星曰雲雨明則多雨水火守之大旱天廐十星  
在東壁北蓋天馬之廐今之驛亭也不見則天下  
道斷鉄鎖五星在天倉西南刈具也主斬芻飼牛  
馬明則牛馬肥微暗則牛馬飢餓并死喪也

西方

奎腰細頭尖似破鞋一十六星遶鞋生外屏七鳥奎  
下横屏下七星天溷明司空左畔土之精奎上一宿  
軍南門河中六箇閣道形附路一星道傍明五箇吐

花王良星良星近上一策名

奎十六度天之武庫也石氏謂之天豕亦曰封豕  
主兵九尺下爲天之中道又主溝瀆西南大星所  
謂天豕目亦曰大將明則天下安動則兵亂客星  
守入兵起金火守有水災隋志云若帝淫泆政不  
平則奎有角角動則有兵不出年中或有溝瀆之  
事又曰奎中星明水大出日月食五星犯皆有凶  
奎南七星曰外屏以蔽天溷也占與天囷同天溷  
七星在外屏南天之厠也不見則人不安移徙亦  
然天溷南一星曰土司空主水土之事大而黃明



天下安若客星入之多土功天下大疫軍南門一  
星在天將軍西南主誰何出入動搖則軍行不見  
則兵亂閣道六星在王良前飛道也從紫宮至河  
神所乘也一曰主道里張衡云天子遊別宮之道  
一曰王良旗一曰紫宮旗亦所以爲旌表而不欲  
其動搖一星不具則輦道不通動搖則宮掖之內  
兵起附路一星在閣道南傍別道也備閣道之敗  
傷而乘之也一曰太僕主禦風雨亦遊從之義也  
一曰占與閣道同王良五星在奎北居河中天子  
奉車御官也其四星曰天駟旁一星曰王良亦曰

天馬其星動爲策馬故曰王良策馬車騎滿野亦  
曰王梁梁爲天橋主禦風雨水道故或占津梁其  
星移主有兵亦曰馬病客星守之橋不通金火守  
之皆爲兵憂前一星曰策王良之御策也主天子  
僕御在王良旁若移在馬後是謂策馬

婁三星不勻近一頭左更右更烏夾婁天倉六箇婁  
下頭天庾四星倉東脚婁上十一將軍侯

婁十二度下九尺爲日月中道亦爲天獄主苑牧  
犧牲供給郊祀亦爲興兵聚衆動搖則聚衆星直  
則有執主之命者就聚國不安金火守之則宮苑



之內兵起日月食宮內亂金木火土犯凶水犯吉  
孛犯起兵月暈兩軍各退左更五星在婁東山虞  
也主知山澤林藪之事亦主仁智右更五星在婁  
西牧師也主官養牧牛馬亦主禮義金火守之山  
澤有兵其占兩更同兩更者秦爵名天倉六星在  
婁南倉穀所藏也星黃而大歲熟東南四星曰天  
庾積廚粟之所也天將軍十一星在婁北主武兵  
中央大星天之大將也外小星吏士也大將星搖  
兵起大將出小星不具兵起

胃三星鼎足河之次天廩胃下斜四星天困十三如  
乙形河中八星名太陵陵北九箇天船名陵中積尸  
一箇星積水船中一黑精

胃十五度天之儲藏五穀之倉也又名大梁明則  
四時和平天下晏然倉廩實不明則上下失位星  
小則少穀輸運又云動則有輸運事就聚則穀貴  
人流暗則凶荒五星犯日月食孛侵並有災天廩  
四星在昴南一曰天廕張衡云主積蓄黍稷以供  
享祀春秋所謂御廩也天困十三星在胃南倉廩  
之屬主給御糧也明而黃則歲豐微變常色則不  
吉金火守之卽災起太陵八星在胃北主陵墓明



而大或中星多則天下多死喪或兵起天船九星  
在太陵之北居河中一曰舟星主渡亦主水旱不  
在河中津河不通水泛溢中四星欲其均明即天  
下安不則兵若喪移徙亦然客彗出入爲大水有  
兵太陵中一星曰積尸明則死人如山張衡云一  
名積廩積尸明而大或其傍星多則天下多死喪  
或兵起若不見而暗皆吉火守則天下大哭泣天  
船中一星曰積水主候水災

昴七星一聚實不少阿西月東各一星月下五黃天  
陰名陰下六鳥芻藁營營南十六天范形河裏六星  
名卷舌舌中黑點天讒星礪石舌傍斜四丁

昴十一度下爲日月中道天之耳目也主西方主  
獄事又爲旄頭胡星也又主喪甘氏云主口舌奏  
對若明大則君無佞臣天下安和暗小則佞者被  
誅搖動君信讒殺忠良張衡云昴明則獄訟平暗  
則刑罰濫六星與大星等大水有白衣會七星黃  
兵大起動搖有大臣下獄大而盡動若跳躍者胡  
兵大起一星不見皆憂兵之象也天阿一星在胃  
東月一星在昴東皆黑星並主女人災福又曰天  
阿主察山林妖變天陰五星在畢柄西主從天子



弋獵之臣預陰謀也不明則禁言漏洩天苑十六  
星在昴畢南如環狀天子之苑圍養禽獸之所也  
主馬牛羊明則牛馬羊盈希則死芻藁六星在苑  
西以供牛馬之食也一曰天積天子之藏府也星  
盛則歲豐穰希則貨財散張衡云不見則牛暴死  
火守之則火災起卷舌六星在昴北天讒之外主  
口語以知讒佞張衡云主樞機曲而靜則賢人用  
直而動則讒人得志卷舌移出漢則天下多妄言  
旁星繁則死人如丘山天讒一星在卷舌中主醫  
巫占與從官同礪石四星在五車北主磨礪鋒刃

明則兵起如常則吉金火及客星守之兵動

畢恰似爪义八星出附耳畢股一星光天街兩星畢  
背傍天節耳下八烏幢畢上橫列六諸王王下四皂  
天高星節下團圓九州城畢口斜對五車口車有三  
柱任縱橫車中五箇天潢精潢畔咸池三黑星天關  
一星車腳邊參旗九箇參車閒旗下直建九旂連旂  
下十三烏天園九旂天園參腳邊  
畢十七度主邊兵主弋獵其大星曰天高一曰邊  
將主四夷之尉也星明大則遠夷來貢天下安失  
色則邊兵亂一星亡爲兵喪動搖邊城兵起有讒



通志方文略一  
臣離徙天下獄亂就聚法令酷甘氏云畢主街巷  
陰雨天之雨師也故明而移動則霖潦及街巷壅  
塞明而定則天下安張衡云畢爲天馬一曰日月  
食邊兵凶將衰木犯有軍功昴畢閒二星曰天街  
三光之道也主伺候關梁張衡云主國界也街南  
爲華夏街北爲夷狄金火守之胡夷兵起明王道  
正暗兵起附耳一星在畢下天高東南隅主聽得  
失伺愆邪察不祥星盛則中國微有盜賊邊候警  
外國反鬪兵連年合移動則佞讒行兵大起邊尤  
甚入畢兵起天節八星在畢南主使臣之所持也

宣威德於四方明吉闇凶諸王六星在五車南天  
漢之中主宗社蕃屏王室也明則諸侯奉上天下  
安不見宗社傾危四方兵起天高四星在參旗西  
北近畢此臺榭之高主遠望氣象不見則官失其  
守陰陽不和五車五星三柱九星共十四星在畢  
東北五車主天子五兵張衡云天子兵車舍也西  
北曰天庫主太白秦也次東北星曰天獄主辰星  
燕趙也次東南星曰天倉主歲星衛魯也中央星  
曰司空主鎮星楚也次西南星曰卿主熒惑魏也  
五星有變各以其所主而占之三柱一曰三泉  
天卽



淵一曰休即天一曰旗即天五星均明柱皆具即

人倉廩實不具其國絕食兵且起五車三柱有變  
各以其國占之三柱出外兵出柱入兵入柱出一  
月米貴三倍期一年出兩月米貴六倍期二年出  
三月米貴十倍期三年柱出不與天倉相近米穀  
運出千里柱倒立尤甚火入守天下旱金入守兵  
起水入月暈不爾則有赦天潢五星在五車中主  
河梁津渡之處也不見則河梁不通咸池三星在  
五車中天潢南魚圍也金火犯之則有大災隋志  
云月五星入天潢兵起道不通天下亂易政咸池

明有龍墮死虎狼害人兵起天關一星在五車南  
畢西北亦曰天門日月五星所行之道也主邊塞  
事主關閉芒角有兵五星守之貴人多死移徙若  
與五車合大將軍披甲參旗九星在參西五車之  
閒天旗也明而希則邊寇不動不然反是隋志參  
旗一曰天旗一曰天弓主司弓弩之張候變禦難  
玉井西南九星曰九旂天子之旗也主邊軍進退  
金火守之兵亂起天苑之南十三星曰天園植果  
菜之所也曲而鈎則果菜熟不然則否  
觜三星相近作參彙觜上坐旗直指天尊卑之位九



相連司怪曲立坐旗邊四鴟大近井鉞前

觜一度在參之右角如鼎足形主天之關明大則天下安五穀熟移動則君臣失位天下旱隋志云觜觶爲三軍之候行軍之藏府主葆旅收斂萬物明則軍儲盈將得勢動而明盜賊群行葆旅起動移將有逐者張衡云葆旅野生之可食者金火來守國易政兵起災生日食臣不忠月食君害臣五星犯災生孛客星犯兵起坐旗九星在司怪西北主別君臣尊卑之位明則國有禮暗則反是司怪四星在井鉞前候天地日月星辰禽獸蟲蛇草木

之變與天高占同

參總有十星觜相侵兩肩覆足二爲心伐有三星足裏深玉井四星右足陰屏星兩扇井南襟軍井四星屏上吟左足下四天厠臨厠下一物天屎沉

參十度上爲日月五星中道廿氏曰參爲忠良孝謹之子明大則臣忠子孝安吉移動殺忠臣一曰參伐一曰大辰一曰天市一曰鈇鉞主斬刈又爲天獄主殺伐又主權衡所以平理也又主邊城爲九譯故不欲其動也參白獸之體其中三星橫列三將也東北曰左肩主左將西北曰右肩主右將



東南曰左足主後將軍西南曰右足主偏將軍故  
黃帝占參應七將中央三小星曰伐天之都尉也  
主胡鮮卑戎狄之國故不欲明又曰七將皆明天  
下兵精也王道缺則芒角張伐星明與參等大臣  
謀亂兵起參星失色軍散敗參芒角動搖邊侯有  
急天下兵起又曰有斬伐之事參左足入玉井中  
兵大起秦地大水若有喪山石爲怪參足若突出  
玉井則虎狼暴害人差戾王臣貳金火來守則國  
易政兵起災生日月食則田荒米貴五星犯災甚  
玉井四星在參西右足下水象也屏二星在玉井  
南屏爲屏風客星入之四足蟲大疾人亦多死不  
見則國內寢疾玉井東下四星曰軍井行軍之井  
也軍井未達將不言渴名取此也又曰主軍營之  
事天厠四星在屏東溷也主天下疾病黃吉青赤  
白皆凶不見與屏同天屎一星在厠南色黃則吉  
他色皆凶

南方

井八星橫列河中淨一星名鉞井邊安兩河各三南  
北正天樽三星井上頭樽上橫列五諸侯侯上北河  
西積水欲覓積薪東畔是鉞下四星名水府水位東



邊四星序四瀆橫列南河裏南河下頭是軍市軍市  
團圓十三星中有一箇野雞精孫子丈人市下列各  
立兩星從東說闕丘二箇南河東正下一狼光蒙茸  
左畔九箇彎弧弓一矢擬射頑狼胷有箇老人南極  
中春秋出入壽無窮

井三十四度甘氏云井八星在河中主泉水日月  
五星貫之爲中道石氏謂之東井亦曰天井主諸  
侯帝戚三公之位故明大則封侯建國搖動失色  
則諸侯戚廢戮三公帝師受殃矣張衡云天之南  
門也黃道所經爲天之亭候主水衡事法令所取

平也王者用法平則井明而端列鉞一星附井之  
前主伺奢淫而斬之故不欲其明大與井齊或搖  
動則天子用鉞於大臣月宿井有風雨之應又曰  
井爲天子府暗芒并日月食五星逆犯大臣謀亂  
兵起中有六星不欲大明明即水災南北兩河各  
三星分夾東井一曰天高天之闕門主關梁南河  
曰南戍一曰南宮一曰陽門一曰越門一曰權星  
主火北河曰北戍一曰北宮一曰陰門一曰胡門  
一曰衡星主水兩戍之間三光之常道也河戍動  
搖中國兵起張衡云河南星不具則南道不通北



亦如之動搖及火守中國兵起天樽三星在五諸  
侯南主盛饘粥以給酒食之正也張衡云以給貧  
餒明則豐暗則荒或言暗吉五諸侯五星在東井  
東北近北河主刺舉戒不虞又曰治陰陽察得失  
亦曰主帝心一曰帝師二曰帝友三曰三公四曰  
博士五曰太史又曰五曰大夫此五者常爲帝定  
疑議星明大潤澤則天下大治芒角則禍在中張  
衡又曰五諸侯治陰陽察得失明而潤大小齊等  
則國之福又曰赤則豐暗則荒積水一星在北河  
北所以供酒用也不見爲災又曰主候水災積薪

一星在積水東以備庖厨之用明則人主康火守  
之大旱水府四星在東井西南水官也占與水位  
同水位四星在東井東主水衡又主瀉溢流也故  
巫咸氏贊曰水位四星瀉溢流移動近北河則國  
沒爲江河若水火及客星守犯之百川盈溢四瀆  
四星在東井南軒轅東以江河淮濟之積精也明  
大則水泛溢軍市十三星如錢狀在參東南天軍  
貨易之市客星及金火守之軍大飢野雞一星在  
軍市中主變怪也以芒角動搖爲兵災移出則諸  
侯兵起軍市西南二星曰丈人丈人東二星曰子



子東二星曰孫丈人主壽考之臣不見人臣不得  
通子與孫皆侍丈人之側相扶而居不見爲災守  
常無咎闕丘三星在南河東主象魏天子之震闕  
諸侯之兩觀也金火守之兵戰闕下狼一星在天  
市東南爲野將主殺掠色有常不欲變動角而變  
色動搖盜賊作胡兵起人相食躁則人主不靜不  
居其宮馳騁天下張衡云居非其處則人相食色  
黃白而明吉黑凶赤芒角兵起金火守之亦然弧  
矢九星在狼東南天弓也以備盜賊常向狼弧矢  
動搖不如常者多盜賊明則兵大起狼弧張害及

胡天下乖亂又曰天弓張天下盡兵主與臣相謀  
張衡云引滿則天下兵起老人一星在弧南一曰  
南極常以秋分之旦見于丙春分之夕沒于丁常  
以秋分候之南郊明大則人主有壽天下安寧不  
見則人主憂

鬼四星用方似木櫃中央白者積尸氣鬼上四星是  
燿位天狗七星鬼下是外廚六閒柳星次天社六箇  
弧東倚社東一星是天紀

輿鬼二度爲日月五星之中道主死亡疾病張衡  
云主祠祀天目也又主視明察姦謀東北星主積



馬東南星主積兵西南星主積布帛西北星主積金玉隨其變占之中央一星名積尸亦曰積尸氣者但見氣而已主死喪祠祀一曰鈇鑕主誅斬鬼星明大則穀成不明人散動而光上賦歛重徭役多星徙人愁政令急鬼質欲其忽忽不明則安明則兵起大臣謀主下流亡甘氏云積尸搖動失色則疾病鬼哭人荒軒轅西四星曰燿亦曰烽燿主烽火備警急占以不明安靜明大甚則邊亭警急搖動芒角亦然又曰明吉暗凶天狗七星在鬼西南狼之北橫河中以守賊也移徙則兵起金火犯之人相食外廚六星在柳南天子之外廚也占與天廚同弧南六星爲天社在老人東南似柳直明則吉隋志云共工之子勾龍能平水土故祀以配社其精爲星外廚之南一星曰天紀主知禽獸齒歲金火守之禽獸多死

柳八星曲頭垂似柳近上三星號爲酒享宴大酺五星守

柳十四度上爲天之中道甘氏云主飲食倉庫酒醋之位明大則人豐酒食搖動則大人酒死失色則天下不安飢饉流於道路不過三年必應張衡



通志卷之四十一  
云柳爲朱雀之喙天之廚宰也主尚食和滋味隋志云又主雷雨一曰天相一曰天庫一曰注又主木功星明大臣重慎國安廚食具注舉首王命與輔佐出星直天下謀伐其主就聚兵鬪國門酒旗三星在軒轅右角之南酒官之旗也主享宴飲食五星守酒旗天下大酺有酒肉財物之賜及爵宗室

星七星如鉤柳下生星上十七軒轅形軒轅東頭四內平平下三箇名天相相下稷星橫五靈

七星七度甘氏云主后妃御女之位亦爲賢士若

失色芒動則后妃死賢士誅明大則道化成國盛張衡云七星爲朱鳥之頸一名天都主衣裳文繡隋志云主急兵守盜賊故欲明則王道昌暗則賢良不處天下空天子疾動則兵起離則易政日食兵飢婦人災木犯人安火犯旱金土水犯俱災月暈孛犯兵起軒轅十七星在七星北黃帝之神黃龍之體也后妃之主士女職也一曰東陵一曰權星主雷雨之神南大星女主也次北一星夫人也屏也上將也次北一星妃也次將也其次諸星皆次妃之屬也女主南小星女御也左一星少民少



通志天文略一  
后宗也右一星大民太后宗也欲其色黃小而明也張衡云軒轅如龍之體主雷雨之神後宮之象焉陰陽交合盛爲雷激爲電和爲雨怒爲風亂爲霧凝爲霜散爲露聚爲雲立爲虹蜺離爲背裔分爲抱珥此十四變皆軒轅主之其星欲小而黃明則吉移徙則國人流迸東西角張而振后敗水火金守之女主惡也漢注曰軒轅爲權太微爲衡月五星守犯者如衡占內平四星在中台南燿之北平罪之官也明則刑罰平暗則否酒旗南三星曰天相丞相之象也其占與相星略同稷五星在七

星之南主農正也取乎百穀之長以爲其號明大則歲大豐不明則儉不見則人相食

張六星似軫在星旁張下只是有天厖十四之星冊四方長垣少微雖向上星數歌在太微傍天尊一星直上黃

張十七度甘氏云主天廟明堂御史之位上爲天之中道若明大則國盛彊失色宗廟不安明堂宮廢隋志云主珍寶宗廟所用及衣服又主天厨飲食賞賚之事星明則王者行五禮得天之中動則賞賚離徙天下有逆人就聚有兵金火守之有兵



起或云主貢物色細無光王者少子孫日食虧修禮也月食大澇魚行人道火孛犯兵起水土犯國不寧張南十四星曰天廟天子祖廟也客星守之祠官有憂其占與虛梁同長垣四星在少微南主界域及胡夷火守之胡人入中國太白入之九卿謀反少微四星在太微西南北列士大夫之位也一名處士亦天子副主或曰博士官一曰主衛掖門南第一星爲處士第二星爲議士第三星爲博士第四星爲大夫明大而黃則賢士舉月五星犯守之處士女主憂宰相易

翼二十二星大難識上五下五橫著行中心六箇恰如張更有六星在何許三三相連張畔附必若不能分處所更請向前看野取五箇黑星翼下頭欲知名字是東甌

翼十九度甘氏云主太微三公化道文籍失色則民流日月交食五星並逆芒動則化道不行文籍壞滅動移則三公廢明大則化成隋志云翼爲天之樂府主俳倡戲樂又主夷狄遠客負海之賓明大則禮樂興四夷來賓動則蠻夷使來離徙則天子舉兵或云明則禮樂興暗則政教失日食臣僭



月食婦人憂五星孛流客犯大凶東甌五星在翼  
之南蠻夷星也張衡云主東越穿胷南越三夷金  
火守之其地有兵芒角動移兵內叛

軫四星似張翼相近中央一箇長沙子左轄右轄附  
兩星軍門兩黃近翼是門下四箇土司空門東七烏  
青丘子青丘之下名器府器府之星三十二以上便  
爲太微宮黃道向上看取是

軫十七度甘氏云軫七星主將軍樂府歌謹之事  
五星犯之失位亡國女子主政人失業賊黨掠人  
禍生於百日内若明大則天下昌萬民康四海歸

王張衡云軫爲冢宰輔臣也主車騎明大則車騎  
用一云明大則車騎動隋志云主載任有軍出入  
皆占於軫又主死喪明則車駕備動則車騎用離  
徙天子憂就聚兵大起轄兩星附軫兩傍主王侯  
左轄爲王者同姓右轄爲異姓星明兵大起遠軫  
凶軫轄舉南蠻侵張衡云轄不見國有大憂長沙  
一星在軫之中主壽命也長沙明則人壽長子孫  
盛軍門二黃星在青丘西天子六軍之門也主營  
候豹尾威旗占以移其處爲道不通土司空四黃  
星在軍門南主土功巫咸氏云金火犯之天下男



不得耕女不得織隋志云一曰司徒主界域青丘  
七黑星在軫東南主東方三韓之國占與東甌同  
軫南三十二星曰器府主樂器之府也明則樂器  
調理暗則有咎

天文略第一

天文略第二

太微宮

上元太微宮昭昭列象布蒼穹端門只是門之中左  
右執法門西東門左皂衣一謁者以次卽是鳥三公  
三黑九卿公背傍五黑諸侯卿後行四箇門西主軒  
屏五帝內坐於中正幸臣太子并從官鳥列帝後從  
東定郎將虎賁居左右常陳郎位居其後常陳七星  
不相誤郎位陳東一十五兩面宮垣十星布左右執  
法是其數宮外明堂布政宮三箇靈臺候雲雨少微  
四星西南隅長垣覆覆微西居北門西外接三台與



垣相對無兵災

太微垣十星在翼軫北張衡云天子之宮庭五帝之坐十二諸侯府也其外蕃九卿也一曰軒轅爲權太微爲衡衡主平也隋志云又爲天庭理法平辭監升授德列宿受符諸神考節舒情稽疑也南蕃中二星閒曰端門東曰左執法廷尉之象也西曰右執法御史大夫之象也執法所以舉刺凶奸者也左執法之東左掖門也右執法之西右掖門也東蕃四星南第一曰上相其北東太陽門也第二星曰次相其北中華東門也第三星曰次將其

北東太陰門也第四星曰上將所謂四輔也西蕃四星南第一星曰上將其北西太陽門也第二星曰次將其北中華西門也第三星曰次相其北西太陰門也第四星曰上相亦四輔也東西蕃有芒及動搖者諸侯謀天子也執法移則刑罰尤急月五星入太微軌道吉其所犯中坐成刑謁者一星在太微內左執法東北主贊賓客也不見外國不賓服謁者東北三星曰三公內坐朝會之所居也張衡云以輔弼帝者其名與夾斗三公同三公北三星曰九卿內坐主治萬事與天紀同占九卿西



五星曰內五諸侯內侍天子不之國也辟雍之禮  
得則太微諸侯明屏四星在端門內帝座南近右  
執法屏所以擁蔽帝庭也執法主刺舉星大明潤  
則君臣有禮黃帝內坐一星在太微中含樞紐之  
神也天子動得天度止得地意從容中道則太微  
五帝之坐明以光黃帝坐不明人主當求賢士以  
輔治不然則奪勢又曰太微五帝坐小弱青黑天  
子國亡四帝內坐四星夾黃帝坐東方星蒼帝靈  
威仰之神也南方星赤帝赤熒怒之神也西方星  
白帝白招矩之神也北方星黑帝叶光紀之神也

張衡云五帝同明而光則天下歸心不然則失位  
金火水入太微若順入軌道伺其出之所守之分  
則爲天子所誅也帝坐東北一星曰幸臣主親愛  
臣明則幸臣用事微細吉太子一星在幸臣西五  
帝坐北儲貳之星明而潤則太子賢不然則否金  
火守入太子不廢則爲篡逆之事從官一星在太  
子西北主從官不見則帝不安如常則吉郎將一  
星在郎位東北所以爲武備張衡云今左右中郎  
將是也大明芒角將怒不可當也虎賁一星在太  
微西蕃之外上相之西下台之南靜室旄頭之騎



通志天文略二  
官也張衡云主侍從之武臣也與車騎同占常陳  
七星如畢狀在郎位北天子宿衛虎賁之士以設  
彊毅也星搖動天子自出明則武兵用微則武兵  
弱郎位十五星又云二十四星在帝坐東北一曰  
依烏郎位也周官之元士漢官之光祿中散騎諫  
議議郎三署郎中是其職也張衡又云今之尚書  
郎也欲其大小相均光潤有常吉隋志郎位主守  
衛也其星明大臣有劫主又曰客犯上其星不具  
后死幸臣誅客星入之大臣爲亂明堂三星在太  
微西南角外天子布政之宮也明吉暗凶明堂西

三星曰靈臺主觀雲物察符瑞候災變也占與司  
怪同少微長垣二坐星已釋在張星之次矣三台  
六星兩兩而居起文昌列招搖太微一曰天柱三  
公之位也在天曰三台主開德宣符也西近文昌  
二星曰上台爲司命主壽次二星對軒轅曰中台  
爲司中主宗室東二星抵太微曰下台爲司祿主  
兵所以昭德塞違也又曰三台爲天階太一躡以  
上下一曰泰階上階上星爲天子星下星爲女主  
中階上星爲諸侯三公下星爲卿大夫下階上星  
爲士下星爲庶人所以和陰陽而理萬物也其星



有變各以所主占之君臣和集如其常度張衡云  
色齊明而行列相類則君臣和法令平不齊爲乖  
度金火守入兵起彗孛尤甚也

### 北極紫微宮

中元北極紫微宮北極五星在其中大帝之坐第二  
珠第三之星庶子居第一號曰爲太子四爲后宮五  
天樞一云第三明者帝之居第四名曰四庶子最小第五天之樞左右四星是四  
輔天一太一當門路左樞右樞夾南門兩面營衛一  
十五上宰少尉兩相對少宰上輔次少輔上衛少衛  
次上丞後門東邊大贊府門西喚作一少丞以次却

向前門數陰德門裏兩黃聚尚書以次其位五女史  
柱史各一戶御女四星五天柱大理兩星陰德邊勾  
陳尾指北極顛勾陳六星六甲前天皇獨在勾陳裏  
五帝內坐後門是華蓋并杠十六星杠作柄象蓋傘  
形蓋上連連九箇星名曰傳舍如連丁垣外左右各  
六珠右是內階左天廚階前八星名八穀廚下五箇  
天棊宿天牀六星左樞在內廚兩星右樞對文昌斗  
上半月形希疎分明六箇星文昌之下曰三公太尊  
只向三公明天牢六星太尊邊太陽之守四勢前一  
箇宰相太陽側更有三公相西偏即是玄戈一星圓



天理四星斗裏暗輔星近著開陽淡一本云文昌之  
六星四勢前更有三公相西偏即是太陽一星圓天理四星斗裏暗輔星近著開陽淡北斗之  
宿七星明第一主帝名樞精第二第三璇璣星第四  
名權第五衡闔陽搖光六七名

北極五星在紫微宮中一名天極一名北辰其紐  
星天之樞也天運無窮三光迭耀而極星不移故  
曰居其所而衆星拱之第一星主月太子也第二  
星主日帝王也亦爲太一之坐謂最赤明者也第  
三星主五星庶子也北極五星最爲尊也中星不  
明主不用事右星不明太子憂也其第四星爲后

宮第五星爲天樞張衡云一星並爲後宮北極五  
星明大則吉變動則憂抱極樞四星曰四輔所以  
輔佐北極而出度授政也張衡云抱極之細星也  
爲輔臣之位主贊萬機小而明吉大明及芒角臣  
逼君暗則官不理天一星在紫宮門右星之南  
天帝之神也主戰鬪知人吉凶者也太一一星在  
天一南相近亦天帝神也主使十六神知風雨水  
旱兵革飢饉疾疫災害所生之國也張衡云天一  
逼閭闔外其占明而有光則陰陽和合萬物成人  
主吉不然反是太一占與天一略同紫宮垣十五



星其西藩七東藩八在北斗之北一曰紫微大帝  
之坐也天子之常居也主命主度也一曰長垣一  
曰天營一曰旗星爲藩衛備藩臣也宮闕兵起旗  
星直天子出自將宮中兵張衡云紫微垣十五星  
東藩八西藩七其東藩近閭闔門第一星爲左樞  
第二星爲上宰第三星爲少宰第四星爲上輔第  
五星爲少輔第六星爲上衛第七星爲少衛第八  
星爲少丞其西藩近閭闔門第一星爲右樞第二  
星爲少尉第三星爲上輔第四星爲少輔第五星  
爲上衛第六星爲少衛第七星爲上丞皆以明大

有常則吉若盛明則內輔盛也宮垣直而明天子  
將兵開則兵起西藩正南開如門象名閭闔門有  
流星自門而出四野者當有中使銜命視其所適  
分野而論之也陰德二星在紫微宮內尚書之西  
主施德者其占以不明爲宜明則新君踐極隋志  
曰尚書西二星曰陰德陽德主周急振撫又分爲  
二坐星矣門內東南維五星曰尚書主納言夙夜  
咨謀龍作納言此之象也張衡曰八坐大臣之象  
其占與四輔不殊極東一星曰柱下史主左右記  
君之過星明則史直辭不明反是柱史北一星曰



通志天文卷二  
女史婦人之微者主傳漏故漢有侍史張衡云婦  
官也主記宮內之事其占與柱史同御女第四星  
在紫微宮內勾陳之北八十一御妻之象也其占  
明則多內寵不明則否晉志謂之女御宮天柱五  
星在紫微宮門內華蓋杠左傍近東垣北隅法五  
行主晦朔晝夜之職明正則吉人安陰陽調不然  
則司歷過隋志云建政教立圖法之府也常以朔  
望日垂禁令於天柱以示百司周禮以正歲之月  
示法象魏此之謂也大理二星在紫微門內次近  
陰德決獄之官星明則刑憲平不明則冤酷深勾

陳六星在紫微宮華蓋之下隋志云後宮也大帝  
之正妃也大帝之帝居也張衡云大帝所居之宮  
也亦將軍之象也星明則吉暗則人主惡之勾陳  
口一星曰天皇亦曰大帝其神曰曜魄寶主御群  
靈秉萬機神圖也其星隱而不見見則爲災六甲  
六星在紫微宮內華蓋杠左傍分掌陰陽紀時節  
明則陰陽和不明則寒暑易節五帝內坐五星在  
華蓋下勾陳上斧戾之象所以備宸居者明正則  
吉變動則災凶隋志云客星犯紫宮中坐大臣犯  
主華蓋七星其杠九星合十六星在勾陳上正當



通志卷之二十一  
大帝所以覆蔽大帝之坐也明正則吉傾動則凶  
傳舍九星在華蓋上近河賓客之館主胡人入中  
國客星守之備姦使亦曰胡兵起內階六星在文  
昌北天皇之陛也明吉傾動凶紫微東垣北維外  
六星曰天廚天子百官之廚也見吉不見凶八穀  
八星在紫微西藩之外五車之北其八星一主稻  
二主黍三主大麥四主小麥五主大豆六主小豆  
七主粟八主麻子明則八穀皆成暗則不熟一星  
不見則一穀不登八星不見則國人餬口天棊五  
星在女牀東北天子先驅所以禦難也不明則國

兵起一曰主爭訟明大凶小吉天牀六尾當闔闔  
門外主天子寢舍解息燕休之處星正大吉君有  
慶傾則人主不安一云在宮門外聽政之象也爲  
寢舍也暗凶內廚兩星在紫垣外西南角主六宮  
之內飲食府也一云主后夫人與太子宴飲居常  
無咎有犯守凶文昌六星在北斗魁前天之六府  
也主集計天道一曰上將大將軍建威武二曰次  
將尚書正左右三曰貴相太常理文緒四曰司祿  
司中司隸賞功進爵五曰司命司怪太史主滅咎  
六曰司寇大理佐理寶所謂一者起北斗魁前近



內階者也明潤大小齊天瑞臻張衡云其占黃潤  
光明萬人安大小均天瑞降青黑細微多所害搖  
動移徙大臣憂金火守入兵興字彗犯國亂一曰  
文昌動則三公受誅后崩災福與三公同三公三  
星在北斗柄東又三公星在北斗魁西並爲太尉  
司空司徒之象主燮理陰陽弼君機務其星移徙  
不吉居常安金火守之三公有凶隋志曰杓南三  
星及魁第一星皆曰三公宣德化調七政和陰陽  
之官也太尊一星在中台之北貴戚也巫咸云聖  
公之象居常爲定不見則凶金犯守爲災貴賤將

敗者也天牢六星在北斗魁下貴人之穿也主愆  
過禁暴淫與貫索同占太陽守一星在相西大將  
大臣之象也主戒不虞設武備也非其常兵起明  
吉暗凶移徙大臣誅勢四星在太陽守西北刑餘  
人而用事者也不明吉明即闡官擅權相一星在  
北斗南隋志曰相者總領百官而掌邦教以佐帝  
王安邦國集衆事也明吉玄戈一星在招搖北亦  
曰天戈也芒角大而動則四夷兵起其占與梗河  
相類北斗魁中四黑星爲貴人之牢曰天理明及  
搖動與有星者爲貴人下獄北斗七星輔一星在



太微北七政之樞機陰陽之元本也故運乎天中而臨制四方以建四時而均五行也魁四星爲璇璣杓三星爲玉衡又曰斗爲人君之象號令之主又爲帝車取乎運動之義也又魁第一星曰天樞二曰璇三曰璣四曰權五曰玉衡六曰開陽七曰搖光一至四爲魁五至七爲杓樞爲天璇爲地璣爲人權爲時玉衡爲音開陽爲律搖光爲星石氏云第一曰正星主陽德天子之象也二曰法星主陰刑女主之位也三曰令星主禍害也四曰伐星主天理伐無道五曰殺星主中央助四旁殺有罪

六曰危星主天倉五穀七曰部星亦曰應星主兵又云一主天二主地三主火四主水五主土六主木七主金又曰一主秦二主楚三主梁四主吳五主趙六主燕七主齊輔星附乎開陽所以佐斗成功也又曰主危正矯不平又曰丞相之象也七政星明則國昌不明國殃斗旁欲多星則安斗中少星則人恐上天下多訟德者無星二十日有輔星明而斗不明臣彊主弱斗明輔不明主彊臣弱也杓南三星及魁第一星皆曰三公宣德化調七政和陰陽之官也張衡云若天子不恭宗廟不敬鬼



神則魁第一星不明或變色若廣營宮室妄鑿山陵則第二星不明或變色若不愛百姓驟興征役則第三星不明或變色若發號施令不順四時不明天道則第四星不明或變色若廢正樂務淫聲則第五星不明或變色若不勸農桑不務稼穡峻法濫刑退賢傷政則第六星不明或變色若不撫四方不安夷夏則第七星不明或變色凡日月暈連環及斗月暈及搖動兵起其傷及中小星多則天下不安人多怨一云小星多則天下安不然則國人散五曜及客星守入皆凶孛彗尤甚也

### 天市垣

下元一宮名天市兩扇垣墻二十二當門六角黑市樓門左兩星是車肆兩箇宗正四宗人宗星一覆亦依次帛度兩星屠肆前候星還在帝坐邊帝坐一星常光明四箇微茫宦者星以次兩星名列肆斗斛帝前依其次斗是五星斛是四垣北九箇貫索星索口橫者七公成天紀恰似七公形數者分明多兩星紀北三星名女牀此坐還依織女傍三元之象無相侵二十八宿隨其陰水火木土并與金以次別有五行分



通志卷之二  
天市垣二十二星在房心東北主權衡主聚衆一  
曰天旗庭主斬戮之事也市中星衆潤澤則歲實  
星稀則歲虛熒惑守之戮不忠之臣又曰若怒角  
守之者臣殺主彗星出爲徙市易都客星入之兵  
大起出之有貴喪張衡曰天市明則市吏急商人  
無利忽忽暗則反是市樓六星在市中臨箕星之  
上主司闕闡明則吉暗則市吏不理也隋志市樓  
者市府也主市價律度其陽爲金錢其陰爲珠玉  
變見各以所主占之車肆二星在天市垣南門之  
內主車駕不明則國車盡行隋志主衆賈之區宗

正二星在帝坐東南宗大夫也彗星守之若失色  
宗正有事客星守動則天子親屬有變又曰客星  
守之貴人死又曰宗正明則宗室有秩暗則國家  
凶宗人四星在宗正東主錄親疎享祀如綺文而  
明主族人有序宗星二星在宗人東北候星之東  
宗室之象帝輔血脉之臣也客星守之宗人不和  
帛度一星在宗星東北主度量明則尺量平商人  
不欺暗則否屠肆三星在帛度東北主烹宰明大  
則肆中多宰殺候一星在帝坐東北主伺陰陽也  
明大輔臣彊四夷開候細微則國安亡則主失位



移則主不安居常則吉帝坐一星在天市中候星  
四天庭也光而潤則天子吉威令行微小凶大人  
當之或云暗則大人不正張衡云帝坐者帝王之  
坐帝坐有五一坐在紫微宮一坐在大角一坐在  
心中一坐在天市垣一坐在太微宮咸云帝坐一  
曰神農所居不見則大人當其咎宦者四星在帝  
坐西南帝傍之闍人也星微則吉明則凶非其常  
宦者有憂其占與勢星同列肆二星在斛西北主  
寶玉之貨移徙則列肆不安火守入兵大起斗五  
星在宦者西南主平量覆則歲熟仰則大飢明暗

與帛度同斛四星在市樓北亦曰天斛三量者也  
占與斗同貫索九星在七公前一曰連索一口連  
營一曰天牢主法律禁暴彊也牢口一星爲門欲  
其開也九星皆明天下獄煩七星見小赦五星見  
大赦動則斧鑕用中空則更元漢志云十五星張  
衡云貫索開有赦不見卽刑獄簡若閉口及星入  
牢中有繫死者常以午子夜候之一星不見則有  
小喜二星不見賜祿三星不見人主德令行且赦  
若客出視其小大大有大赦小有小赦或云貫索  
爲賤人之牢一星芒有喜事二星芒賜爵祿三星



通志天文卷二  
芒有赦門閉牢中多死水犯災火犯米貴七公七  
星在招搖東天之相也三公之象張衡云七公橫  
列貫索之口主執法列善惡之官也星齊正則國  
法平差戾則獄多冤酷或云星入河米貴火犯之  
兵起天紀九星在貫索東九卿也爲九河主萬事  
之紀理冤訟也明則天下多辭訟亡則政理壞國  
紀亂散絕則地震山崩女牀三星在天紀之北爲  
後宮御女主女事明則宮人恣意常則無咎

魏石申以赤點紀星共一百三十八座計八百  
十星商巫咸以黃點紀星共四十四座計一百  
四十四星齊甘德以黑點紀星共一百一十八  
座計五百一十一星三家都紀三百座計一千四  
百六十五星此舊書所紀傳寫之訛數目參差  
無所考正

### 天漢起沒

臣謹按天漢舊有圖無歌故爲之補

天河亦一名天漢起自東方箕尾閒遂乃分爲南北  
道南經傳說入魚淵開籥戴弁鳴河鼓北經龜宿貫  
箕邊次絡斗魁冒左旗又合南道天津湄二道相合  
西南行分夾瓠瓜絡人星杵畔造父騰蛇精王良附



路閣道平登此大陵泛天船直到卷舌又南征五車  
駕向北河南東井水位入吾驂水位過了東南游經  
次南河向闕丘天狗天紀與天稷七星南畔天河沒  
天漢起東方經箕尾之間謂之天河亦謂之漢津  
乃分爲二道其南經傅說魚天籥天弁河鼓其北  
經龜貫箕下次絡南斗魁左旗至天津下而合南  
道乃西南行又分夾瓠瓜絡人星杵造父騰蛇王  
良附路閣道北端太陵天船卷舌而南行絡五車  
經北河之南入東井水位而東南行絡南河闕丘  
天狗天紀天稷在七星南而沒張衡云津漢者金  
之氣也其占曰水漢中星多則水少則旱

### 十二次度數

十二次班固取三統歷十二次配十二野其言最詳  
又有費直說周易蔡邕月令章句所言頗有先後魏  
太史令陳卓更言郡國所入宿度今附而次之

自軫十二度至氐四度爲壽星於辰在辰鄭之分野

屬兗州費直周易分野壽星起軫七度  
蔡邕月令章句壽星起軫六度

自氐五度至尾九度爲大火於辰在卯宋之分野屬

豫州費直起氐十一度  
蔡邕起亢八度

自尾十度至南斗十一度爲析木於辰在寅燕之分



野屬幽州費直起尾九度  
蔡邕起尾四度

自南斗十二度至須女七度為星紀於辰在丑吳越

之分野屬揚州費直起斗十度  
蔡邕起斗六度

自須女八度至危十五度為玄枵於辰在子齊之分

野屬青州費直起女六度  
蔡邕起女二度

自危十六度至奎四度為娵訾於辰在亥衛之分野

屬并州費直起危十四度  
蔡邕起危十度

自奎五度至胃六度為降婁於辰在戌魯之分野屬

徐州費直起奎二度  
蔡邕起奎八度

自胃七度至畢十一度為大梁於辰在酉趙之分野

屬冀州費直起婁十度  
蔡邕起胃一度

自畢十二度至東井十五度為實沈於辰在申魏之

分野屬益州費直起畢九度  
蔡邕起畢六度

自東井十六度至柳八度為鶉首於辰在未秦之分

野屬雍州費直起井十二度  
蔡邕起井十度

自柳九度至張十六度為鶉火於辰在午周之分野

屬三河費直起柳五度  
蔡邕起柳三度

自張十七度至軫十一度為鶉尾於辰在巳楚之分

野屬荊州費直起張十三度  
蔡邕起張十二度

州郡躔次



通志卷之三  
陳卓范蠡鬼谷先生張良諸葛亮譙周京房張衡並  
云角亢氐鄭交州

東郡入角一度

東平任城山陰入角六度

濟北陳留入亢五度 濟陰入氐一度

東平入氐七度 泰山入角十二度

房心宋豫州

潁川入房一度 汝南入房二度

沛郡入房四度 梁國入房五度

淮陽入心一度 魯國入心三度

楚國入房四度

尾箕燕幽州

涼州入箕中十度 上谷入尾一度

漁陽入尾三度 右北平入尾七度

西河上郡北地遼西東入尾十度

涿郡入尾十六度 渤海入箕一度

樂浪入箕三度 玄菟入箕六度

廣陽入箕九度

斗牽牛須女吳越揚州

九江入斗一度 廬江入斗六度



豫章入斗十度

丹陽入斗十六度

會稽入牛一度

臨淮入牛四度

廣陵入牛八度

泗水入女一度

六安入女六度

虛危齊青州

齊國入虛六度

北海入虛九度

濟南入危一度

樂安入危四度

東萊入危九度

平原入危十一度

菑川入危十四度

營室東壁衛并州

定安入營室一度

天水入營室八度

隴西入營室四度

酒泉入營室十一度

張掖入營室十二度

武都入東壁一度

金城入東壁四度

武威入東壁六度

敦煌入東壁八度

奎婁胃魯徐州

東海入奎一度

琅琊入奎六度

高密入婁一度

城陽入婁九度

膠東入胃一度

昂畢趙冀州



魏郡入昴一度 鉅鹿入昴三度  
常山入昴五度 廣平入昴七度  
中山入昴八度 清河入昴九度  
信都入畢三度 趙郡入畢八度  
安平入畢四度 河閒入畢十度  
眞定入畢十三度

冀參魏益州

廣漢入冀一度 越嶲入冀三度  
蜀郡入參一度 犍爲入參三度  
牂牁入參五度 巴蜀入參八度

漢中入參九度 益州入參七度

東井輿鬼秦雍州

雲中入東井一度 定襄入東井八度

雁門入東井十六度

代郡入東井二十八度

太原入東井二十九度

上黨入輿鬼二度

柳七星張周三輔

弘農入柳一度 河南入七星三度  
河東入張一度 河內入張九度



翼軫楚荊州

南陽入翼六度

南郡入翼十度

江夏入翼十二度

零陵入軫十一度

桂陽入軫六度

武陵入軫十度

長沙入軫十六度

七曜

日循黃道東行一日一夜行一度三百六十五日有奇而周天行東陸謂之春行南陸謂之夏行西陸謂之秋行北陸謂之冬行以成陰陽寒暑之節是故傳云日爲太陽之精主生養恩德人君之象也人君有

瑕必露其慝以告示焉故日月行有道之國則光明人君吉昌百姓安寧日變色有暈軍破無暈喪侯王其君無德其臣亂國則日赤無光日失色所臨之國不昌日晝昏行人無影到暮不止上刑急下人不聊生不出一一年有大水日晝昏烏鳥群鳴國失政日中烏見主不明爲政亂國有白衣會將軍出旌旗舉日中有黑子有黑氣黑雲乍三年五臣廢其主日食陰侵陽臣掩君之象有亡國有死君有大水日食見星有殺君天下分裂王者脩德以禳之月者太陰之精也其形圓其質清日光照之則見其



明日光所不照則謂之魄故月望之日日月相望人居其閒盡覩其明故形圓也二弦之日日照其側人觀其傍故半魄也晦朔之日日照其表人在其裏故不見也其行有遲疾其極遲則日行十二度彊極疾則日行十四度半彊遲則漸疾疾極漸遲二十七日半彊而遲疾一終矣又月行之道斜帶黃道十三日有奇在黃道表又十三日有奇在黃道裏表裏極遠者去黃道六度二十七日有奇陰陽一終張衡云對日之衝其大如日日光不照謂之闇虛闇虛逢日則日食值星則星亡今歷家月望行黃道則值闇虛矣值闇虛有表裏深淺故食有南北多少月爲太陰之精以之配日女主之象也以之比德刑罰之義列之朝廷諸侯大臣之類故君明則月行依度臣執權則月行失道大臣用事兵刑失理則月行乍南乍北女主外戚擅權則或進或退月變色將有殃月晝明姦邪並作君臣爭明女主失行陰國兵彊中國飢天下謀僭數月重見國以亂亡

臣謹按丹元子二十八宿及三元之歌所以爲美者以其句中有圖言下見象而不談災祥至五行有五篇吟則反是且五星爲緯而行無定體可以



算數推難以圖象求令五行吟既無圖象之理而  
極論災祥未必丹元子之作也其言濫誣在所不  
取

歲星曰東方春木於人五常仁也五事貌也仁虧貌  
失逆春令傷木氣則罰見歲星歲星盈縮以其舍命  
國其所居久其國有德厚五穀豐昌不可伐其對爲  
衝歲乃有殃歲星安靜中度吉盈縮失次其國有變  
不可舉事用兵又曰人主出象也色欲明光潤澤德  
合同又曰進退如度姦邪息變色亂行主無福又主  
福主大司農主齊吳主司天下諸侯人君之過主歲

五穀赤而角其國昌赤黃而沈其野大穰張衡云歲  
星者東方之精蒼帝之子一名攝提一名重華一名  
應星一名紀星晉灼曰太歲在四仲則歲行三宿太  
歲在四孟四季則歲行二宿二八十六三四十二而  
行二十八宿十二歲而周天熒惑曰南方夏火禮也  
視也禮虧視失逆夏令傷火氣罰見熒惑熒惑法使  
行無常出則有兵入則兵散各以其舍命國爲亂爲  
賊爲疾爲喪爲飢爲兵所居國受殃環繞鈞已芒角  
動搖變色乍前乍後乍左乍右其殃愈甚其南丈夫  
北女子喪周旋止息乃爲死喪寇亂其野亡地其失



行而速兵聚其下順之戰勝又曰熒惑主大鴻臚主  
死喪主司空又爲司馬主楚吳越以南又司天下群  
臣之過司驕奢亡亂妖孽主歲成敗又曰熒惑不動  
兵不戰有誅將其出色赤怒逆行成鉤已戰凶有圍  
軍餉已有芒角如鋒刃人主無出宮下有伏兵芒大  
則人民怒君子遑遑小人浪浪不有亂臣則有大喪  
人欺吏吏欺王又爲理外則理兵內則理政爲天子  
之理也故曰雖有明天子必視熒惑所在其入守犯  
太微軒轅營室房心主命惡之張衡云熒惑爲執法  
之星其精爲風伯之師或童兒歌謠嬉戲晉灼曰熒

惑常以十月則入朝太微受制而出行列宿司無道  
出入無常也二歲而周天

填星曰中央季夏土信也思心也仁義禮智以信爲  
主貌言視聽以心爲政故四星皆失填乃爲之動動  
而盈侯王不寧縮有軍不復所居之宿國吉得地及  
女子有福不可伐去之失地若有女憂居宿父國福  
厚易則薄失次而上二三宿曰盈有主命不成不乃  
大水失次而下曰縮后戚其歲不復不乃天裂若地  
動一曰填爲黃帝之德女主之象主德厚安危存亡  
之機司天下女主之過又曰天子之星也天子失信



則填星大動張衡云填星者黃帝之子女主之象也  
一名地候晉灼曰常以甲辰之始建斗之歲填行一  
宿二十八歲而周天

太白曰西方秋金義也言也義虧言失逆秋令傷金  
氣罰見太白太白進退以候兵高卑遲速靜躁見伏  
用兵皆象之吉其出西方失行夷狄敗出東方失行  
中國敗未盡期曰過參天病其對國若經天天下革  
人更王是謂亂紀人民流亡晝與日爭明疆國弱小  
國疆女主昌又曰太白血主大臣其號上公也大司馬  
位謹候此張衡云太白者白帝之子一名火政一名

官辰一名明堂一名文表一名太皞一名終星一名  
天相一名天浩一名序星一名梁星一名威星一名  
大囂一名大爽晉灼曰常以正月甲寅與熒惑晨出  
東方二百四十日而入入四十日又出西方二百四  
十日而入入三十五日而復出東方出以寅戌入以  
丑未一歲而周天

辰星曰北方冬水智也聽也智虧聽失逆冬令傷水  
氣罰見辰星辰星見則主刑主廷尉主燕趙又爲燕  
趙代以比宰相之象亦爲殺伐之氣戰鬪之象又曰  
軍於野辰星爲偏將軍之象無軍爲刑事和陰陽應



効不効其時不和出失其時寒暑失其節邦當大飢  
當出不出是謂擊卒兵大起在於房心閒地動亦曰  
辰星出入躁疾常主夷狄又曰蠻夷之星也亦主刑  
法之得失色黃而小地大動光明與月相逮其國大  
水張衡云辰星一名勾星一名爨星一名伺星晉灼  
曰常以二月春分見奎婁五月夏至見東井八月秋  
分見角亢十一月冬至見牽牛出以辰戌入以丑未  
二旬而入晨候之東方夕候之西方一歲而周天

## 天文略第二

## 地里略第一

### 地里序

州縣之設有時而更山川之形千古不易所以禹貢  
分州必以山川定經界使兗州可移而濟河之兗不  
能移使梁州可遷而華陽黑水之梁不能遷是故禹  
貢爲萬世不易之書後之史家主於州縣州縣移易  
其書遂廢今之地里以水爲主水者地之脉絡也郡  
縣碁布州道瓜分皆由水以別焉中國之水則江河  
淮濟爲四瀆諸水所歸苟明乎此則天下可運於掌

### 四瀆



渝

四

若

淹

涪

羌

巴

白

潛

南

渝

巫溪

沮水亦作睢出房州房陵縣景山景山在荆山西

百餘里即荆山首也一名發阿山故杜云出新城

郡之西南發阿山東南至當陽潼水入焉又東南

至枝江入江枝江近并入松滋隸江陵此水在郢

都之西故楚昭王西走涉沮

漳水出臨沮縣東荆山臨沮今襄陽南漳縣東南

至當陽縣右入于沮當陽今隸荆門軍

襄

文



旬

清

淮

敖

曰水杜云江夏景陵縣西有曰水出聊屈山西南入漢按景陵今復州景陵

澁水舊云出義陽厥縣西北黃山瀲縣後爲瀲西隋廢入隋縣其水南入于澧

澧水舊云出蔡陽縣大洪山蔡陽今隋州唐城澧水東南至隋縣有澁水入焉又南過安陸入於富

水

漢水名雖多而實一水說者紛然其原出興元府西縣蟠冢山爲漾水東流爲沔水故地曰沔陽又東至南鄭爲漢水有褒水從武功來入焉南鄭興元治興元故漢中郡也又東左與文水會又東過西城旬水入焉又東過鄖鄉縣南又屈而東南過武當縣又東過順陽縣有清水自號州盧氏縣北來入焉又東過中廬別有淮水自房陵淮山東流入焉又東過南漳荆山而爲滄浪之水或云在襄陽即爲滄浪之水又東南過宜城有鄖水入焉又



東過郟敖水入焉又東南曰水入焉又東過雲杜而爲夏水有澠水入焉雲杜後并入安州安陸舊屬江夏郡又東至漢陽觸大別山南入于江漢陽故夏口之地班云行一千七百六十里

鄢水本夷水亦謂之蠻水出房陵今房州治也東南至宜城縣羅川城謂之鄢水又東至蠻城謂之湛水又東入漢蠻城在宜城東三十里靈王公夏將入鄢杜云順漢水南至鄢

彭水杜云出新城昌魏

邗溝水一名韓江一名邗溟溝吳將伐齊霸中國

故於廣陵城東南築邗城城下掘深溝東北通射陽湖西北至末口入淮通江於淮以便糧道邗城今在揚州江都末口在楚州山陽而射陽湖亦在楚州然此乃舊通江淮之道後來以湖道多風晉永和中陳敏更由津湖興寧中復以津湖多風又自湖之南沿東岸二十里穿渠入北口北口即末口自後行者不復由湖然自末口入淮又自彼泝淮達盱眙然後入汴猶有淮患宋朝復穿令徑達盱眙入汴

江水出岷山一名瀆山一名汶阜山今屬茂州汶



山縣發源不一亦甚微所謂發源濫觴者也東南百餘里至天彭山亦謂之天谷亦謂之天彭門兩山相對水徑其閒其山屬今彭州又東南過成都郫縣又東南過江陽有湔水從西北來入焉江陽隋并入隆山唐改爲彭山今屬眉州又南過嘉州犍爲又南過戎州夔道縣北若水淹水從西來入焉又東南至巴郡江州縣有羌水涪水巴水白水潛水渝水合流入焉故庾仲雍謂江州縣對二水口右則涪內水左則巴內水是也江州縣今渝州江津縣是又東過涪州忠州萬州又東過雲安軍

雲安故朐腮縣後周改名又東過魚復魚復今夔州奉節也逕永安宮及諸葛亮圖壘南又東南過赤岬城又東過巫峽巫溪水入焉又東過秭歸又東過夷陵又東過宜都又東過禹斷江又東過枝江有沮水入焉又東過石首又東過華容有涌水入焉又東至巴陵合于洞庭之陂其陂有澧水從西來入焉次有沅水從西南來入焉次有湘水從南來入焉共而東出由武昌出與漢水合而爲大江東過九江有九江水合而爲彭蠡陂從南來入焉又東右過江寧有丹陽水從南來入焉又東左



過江都邗溝出焉又東過江陰許浦入海班云行  
二千六百六十里謬矣

丹陽

桐水出廣德軍西南白石山西北入丹陽湖

彭蠡

湘

沅

澧

涌水在華容縣入江樂史云涌水在江陵府監利  
縣界

沱水禹貢文謂岷山導江東別爲沱班固謂從郫  
縣分而東流至枝江入江今詳之不然疑禹貢之  
文有衍闕

汝水出汝州魯山縣大孟山其地與弘農盧氏接  
界故許慎誤謂出盧氏也其水東南過故定陵縣  
渚水及昆水入焉又有泚水湛水入焉定陵今許  
州舞陽又東南過上蔡至襄信縣汝口南入于淮  
班云行千三百四十里

湛水舊云出犍縣魚齒山東至定陵入汝疑犍後  
來并入葉而定陵乃舞陽



通志地理卷一  
六  
泚水舊云出魯陽東經襄城定陵入汝魯陽今汝州魯山定陵今許州舞陽

澠水出汝州魯山縣堯山東過犍縣故城北魚齒山下疑犍縣後來并入葉縣東過定陵縣西不羹亭又東入汝定陵今許州舞陽

溱水一名漕水一名澮水出滎陽澮城西北雞絡塢下東南入洧

黃水宛陵縣西有黃水西南至新鄭城西入洧黃崖者是其水之側

洧水出滎陽密縣西馬嶺山密今隸河南其水東南有溱水入焉又過新鄭有黃水入焉又東南至長平入潁長平今陳州西華縣班云行五百里潁水舊云出潁川陽城縣西北少室山今陽城縣省入河南登封矣東南至長平縣洧水入焉長平隋改曰西華今陳州又東南過南頓縣潁水入焉又東南至下蔡入淮下蔡今壽州治班云行千五百里

決

肥水出合肥縣雞鳴山北流二十里許分爲三其一東流經合肥縣南又東南入巢湖其一西北流



二百里出壽春西投于淮爾雅出同歸異曰肥今謂之合肥者以其雖二流而合於一源也應劭闕駟皆謂夏水出城父東南與此肥合故曰合肥謬矣此唐人盧潘云

豪

旃然水杜云出滎陽成臯縣東入汴又按酈道元云與索水合

汴水一名鴻溝一名官度水一名通濟渠一名蕩蕩渠或云蕩蕩渠別汴首受河水自汜水縣東南過滎陽陳留睢陵符離至泗州入淮

洙水杜云出魯城北下合泗桑欽云出泰山蓋縣臨樂山西南至汴入泗許慎又云北入泗當以杜爲確

小沂

沂水舊云出蓋縣艾山今其地在泗水奉符閒南流有小沂水從東北來入焉又南過臨沂至下邳入泗班云行六百里

泗水舊云出卞縣故城東南桃虛西北卞縣今兗州泗水縣是說文云泗水受濟水桑欽亦云濟水至濟陰乘氏縣分爲二一水東北流爲北濟一水



南流爲南濟按今此水與濟已不通矣其源出泗水縣西南流有洙水入焉又西南至方與縣荷水入焉其水出乘氏班固亦謂之泗水方與今單州魚臺又云有濇水至高平湖陸入泗水又南至彭城名曰沛水有睢水入焉又西南至下邳沂水入焉又南至楚州山陽入淮此水今人謂之清河或云泗水出鄆州梁山泊睢水杜云首受汴水班云首受菑蕩水疑菑蕩即汴也自浚儀縣東經陳留梁譙沛彭城縣入泗水浚儀近改爲祥符班云行千三百六十里

濇水杜云出東海合鄉縣西南經魯國至高平湖陸入泗按合鄉當在鄒縣東南湖陸當在滕縣薛城之西然樂史云濇出沂州費縣連青山下荷水首受濟東南入泗

淮水出唐州桐柏縣大復山東過義陽今信陽也又東過褒信汝水自西北來入焉又東過安豐決水自南來入焉又東北有窮水從北來入焉又東過下蔡潁水從西北來入焉又東過壽春有肥水從東南來入焉又東北有豪水入焉又北汴水入焉酈道元云汴即菑蕩渠也又東過鍾離又東過



通志地理卷一  
九  
盱眙有汴水從北來入焉又東至山陽通邗溝又東泗水自東北來入焉又東至海州東海入海班云行三千二百四十里濮水自酸棗縣傍河東北過濮陽又東至濟陰鉅野入濟或云首受河馬頰水

濟水從滎陽縣北又東過敖山北又東合滎瀆滎瀆今無水又東索水入焉又東過陽武縣北又東過封丘縣又東過酸棗縣之烏巢澤北又東過乘氏縣南分爲荷水又東北過鉅野濮水入焉又東北過壽張汶水從東北來入焉又北過須城漁山之東左合馬頰水又北過臨邑又東北過故盧城北又東北樂水入焉又東北過華不注山華水入焉又東北過蒲臺縣北又東北過鄒平時水入焉又東北過樂安故城南又東北過利縣西地理志曰利縣在濟城北五十里又東北過甲下邑河分一枝入焉又東北入于海聞今濟水多涸竭

澠水杜云出臨淄縣北經樂安博昌縣南界入時水其流急故諺云瘦馬不渡澠水

時水一名彰春秋襄三年齊晉盟于彰是也一名如水一名澧水其上源岐淺多涸竭故又名乾時



從臨淄縣西北至博昌澠水入焉博昌今青州博  
興又西北過高苑至梁鄒縣入濟高苑舊宣化軍  
今隸淄州梁鄒疑淄州鄒平是

灤水出齊州歷城縣西北入于濟謂之灤口

華水出歷城縣華不注山北入于濟

淄水杜云出泰山梁父縣西入汶按梁父今隸兗  
州奉符班云出萊蕪縣原山東至博昌入濟按博  
昌今青州博興桑欽云出萊蕪原山東北入海按  
三說異同考其形勢當以杜言爲正

汶水出萊蕪縣西南經濟北至東平壽張縣入濟

萊蕪今隸兗州在州東北一云出奉符原山西北

黃水出京縣故亦謂之京水東北流入于濟

索水出京縣西南嵩渚山後齊省京入滎陽京故  
城在縣東南二十里東逕大索城又北逕滎陽城  
東入于濟離水出西塞外東至枹罕入河

湟水出臨羌北東至允吾入河

晉水出晉陽縣西懸甕山晉陽宋朝改爲平晉熙  
寧中省入陽曲晉水過其縣南又東入汾

文

澮水出絳州翼城澮高山又西南過絳與絳水合



又西過虎祈宮南又西入汾  
絳水出絳縣西南入澮

汾水出太原汾陽縣北管涔山汾陽今太原治陽  
曲也東南過晉陽縣東晉水從縣南東流入焉又  
南與文水合又西南過高粱高粱今屬洪洞遂西  
行過臨汾又西過絳縣西四十里虎祈宮北又西  
過王澤有澮水從東來入焉又西至汾陰縣北西  
入于河汾陰今河中滎河縣也班云汾水西南行  
千三百四十里冀州寔也

涑水一名洸水出解州聞喜縣黍葭谷俗謂之華  
谷西南流至蒲阪縣入河蒲阪今河中治河東縣  
桑欽云涑水南過解縣東又西南注于張陽池  
湛水出河內軹縣西北山軹縣唐省入河陽濟源  
縣南行至絳州垣曲縣南入河

沮水出河內軹縣東南至温入河軹唐省入濟源  
縣隸河陽軹故城在懷州河內縣西北二十七里  
沅水出河東垣縣界王屋山垣今爲垣曲隸絳州  
其水東至温縣爲濟水又東南至鞏成臯閒南入  
河

沁水一名少水出上黨故穀遠縣羊頭山南過沁



水縣北又東過河內縣又東過武德縣又東南至  
滎陽北東入河

洹水杜云出汲郡林慮縣東北至魏郡長樂縣入  
清水按林慮今隸相州長樂今大名洹水是也桑  
欽謂洹水出上黨泝氏縣酈道元謂出長子謬矣  
按此水今名安陽河清水即淇水也

淇水一名清水鄭玄云即降水也出衛州共城縣  
北山或云出林慮東至湯陰又東至黎陽入河  
屯氏河

鳴犢河

濁漳水出潞州長子縣鹿谷山一云發鳩山東過  
壺關又東至武安縣東合于清漳

清漳水班云出上黨沾縣大黽谷東北過磁州武  
安與濁漳合而橫流故名曰衡漳又東北過洛州  
曲周平恩縣又東北過冀州武邑又東北過弓高  
縣弓高今爲鎮隸永靜東光又東北過成平成平  
今爲景城鎮隸瀛州樂壽又東北過故平舒縣東  
入海入海者桑欽說也班云至阜成入河行千六  
百八十里

易水出北新城東至文安入滄新城今隸涿州



通志地理略一  
濡水杜云出高陽縣東北至河閒鄭縣入易水按  
高陽順安軍治鄭莫州治正義謂高陽今無此水  
平地趙燕之界無泉出者未知杜言何據然臣聞  
水泉古有處今涸竭者何限杜子之言豈妄哉  
涖水出靈丘縣高氏山靈丘今隸蔚州班云東至  
文安入大河過郡五行九百四十里按文安今隸  
霸州滹沱水班云出代郡鹵城東至文安入海過  
郡六行千三百七十里按鹵城今代州繁峙縣其  
水東經定州深澤縣東南即光武所度處今俗謂  
之危度口又東過瀛州東城平舒開元中盧暉於

此引滹沱東入淇道漑漕文安今隸霸州若是入  
海當在滄州界

河水自西域來其大原有三正原出崑崙山東北  
陬而東行一原出天竺葱嶺一原出于闐南山北  
行與葱嶺河合而東入于崑崙河或云張騫窮河  
源至葱嶺河爾故西域傳云河有兩源一出葱嶺  
一出于闐而沒其正原也三河合而東過蒲昌或  
云入蒲昌海而復東出於理不然乃東至積石山  
下有石門河水冒以西南流是爲中國河積石山  
屬鄯州禹之所道自此始故其詳得聞焉遂過西



平即鄯州又東南過枹罕河州也有洸水從西來入焉又東過臨洮洮州也有離水從西來入焉又東過金城允吾縣湟水從西來入焉金城蘭州也遂轉而北過武威涼州也又北至朔方故夏州也遂轉而東南又南過上郡白土縣囿水從西來入焉上郡綏州也又南過隰州太寧縣壺口山又南過北屈今慈州吉鄉也而爲採桑津又南過龍門有汾水從東來入焉龍門縣今隸河中又南過夏陽梁山之東又南過汾陰縣西郃陽縣東又南過蒲阪縣雷首山西蒲阪今河東也有涑水從東北

來入焉又南過華陰縣潼關渭水從西來入焉遂轉而東過河北縣今陝州平陸也又東過陝縣底柱山在河中水分流包山而過湍急多覆溺舟船又東嶠水從右入焉是謂嶠津亦謂之茅津又東左過絳州垣曲縣湛水從北來入焉又東而爲孟津又東過河陽縣南洛陽縣北又東過温縣沮水從西北來入焉又東右過鞏縣洛水從西南來入焉左過成臯縣北沅水從北來入焉成臯今孟州汜水又東過大伾山下又東汜水從南來入焉又東過滎陽縣西北而爲棘津又東過滎陽縣鴻



溝出焉鴻溝一名官度水一名菴蕩渠今謂之汴  
河大禹塞滎澤開之以引河水東南通淮泗菴蕩  
渠據桑欽所說即此也而班固又云菴蕩渠受濟  
水至陳入潁未詳其實又東北過懷州武陟沁水  
入焉又東過酸棗縣西濮水東出焉或云漢文帝  
時河決酸棗東潰金隄發卒塞之其水遂絕又東  
北而爲延津又東北左過黎陽大伾山黎陽今通  
利軍治也有淇水從西來入焉淇水即降水也又  
東北過濮陽縣別出而爲瓠子河漢武帝時河決  
瓠子水注鉅野通于淮泗發卒塞之又東北過東

武陽今大名朝城也而爲漯河又東北過大名館  
陶縣別出而爲屯氏河又東北過清河靈縣別出  
而爲鳴犢河靈縣隋省入博平今隸博州鳴犢至  
瀛州薊縣與屯氏河通三河今皆絕矣又北過德  
州平原又東北過棣州厭次又東北過濱州渤海  
又東北過青州千乘又東北過甲下邑別出一枝  
入濟又東北入于海舊說禹道河至頓丘分爲二  
渠一曰漯川出武陽至千乘入渤海一曰北瀆出  
貝丘至大陸北播爲九河同爲逆河入于海舊云  
大陸在鉅鹿北乃故大陸縣唐改爲昭慶宋開寶



改爲隆平近省爲鎮入趙州臨城然禹貢大陸當只是汲郡吳澤非趙州大陸縣也漢成帝時河隄都尉許商上言古記九河之名有徒駭胡蘇鬲津今見在成平東光鬲縣界中自鬲津以北至徒駭其閒相去二百里是九河所在徒駭最北鬲津最南徒駭在城平胡蘇在東光鬲津在鬲縣又知其餘六河以次推之曰大史曰馬頰曰覆釜在東光之北成平之南曰簡曰潔曰鈎盤在東光之南鬲縣之北今按圖志瀛州有成平故城又有徒駭河永靜軍有東光縣東連滄州有胡蘇亭蓋因河命

名而滄州復有鬲津鈎盤大史河之名鬲縣故城在德州與滄比境鄭氏云九河齊桓公塞之而北瀆至王莽時亦絕故世謂王莽河今在永靜軍然臣每疑禹之所道無二河按禹貢文東過洛汭至于大伾北過降水至于大陸又北播爲九河同爲逆河入于海又按武帝元光三年春河水徙從頓丘東南流入渤海是爲朝城之漯河然則今河之入海者入渤海爾禹貢所謂入于海者由碣石之海碣石今在平州北瀆者乃禹所道之河其後河犇漯川入于渤海故瀆遂絕九河不復通蓋故瀆



在北漯川在東河決而東勢則然也恐非齊桓公所塞自河決漯川之後北瀆遂微九河皆絕但王莽河上承北瀆下入逆河爲一河微通奈北勢高故後亦絕但由漯川爾大抵河自西戎入塞經秦隴陝洛夾山而行故少有決徙之患自河陽以下東至海千里平田虛壤故多奔決無定流

瓠子河

東汜水鄭地水此則僖三十年秦軍汜南也謂之東汜杜云在中牟按此水西分濟漯東北逕濟陰入于河南汜水鄭地水此則僖二十四年王處子

汜是也謂之南汜出汝州襄城縣浮城山北流至孟州汜水縣入河汜舊音凡今音與辰巳之巳同蓋因傳寫之訛後人音爲文易

灋水舊云出穀城縣潛亭北今穀城并爲河南地東過洛陽至偃師縣又東入洛

澗水出河南新安縣南白石山東南入灋

穀水出澠池縣陽穀谷東南至河南入洛

洛水出商州上洛縣冢嶺山桑欽云出謹舉山恐是上洛舊名謹舉東過熊耳山又東北過盧氏縣又東過河南縣穀水從西來入焉又東過洛陽南



伊水從西來入焉又東過偃師瀍水從西來入焉  
又東北過鞏縣東又北入于河班云行千七十里  
伊水出虢州盧氏縣熊耳山東北過陸渾伊闕至  
洛陽縣南北入于洛班云行四百五十里  
汧水出隴州吳山西北至汧源入渭  
涇水出鎮戎軍笄頭山一名都盧山一名崆峒山  
一名開頭山鎮戎古安定朝那縣也東南流至永  
興高陵縣入渭班云行千六十里  
漆水出鳳翔普潤縣東或云出岐山經華原縣與  
沮水合南至富平縣入于渭

沮水出邠州界經華原縣北入于漆

洛水出同州蒲城縣洛水谷谷在荆山書云荆岐  
既旅是也其水東南流至耀州富平入渭

渭水舊云出隴西首陽縣渭首亭南鳥鼠山首陽  
唐省入渭源隸渭州今隸熙州在州之東其水東  
過隴州汧源汧水從西北來入焉又東過鳳翔郿  
縣斜水從南來入焉又東過槐里縣南澇水入焉  
槐里今末興與平縣又東北過咸陽縣澧水入焉  
又東北過高陵涇水入焉又東北過富平縣漆水  
入焉又東洛水入焉又東過臨潼縣灞水入焉又



東至船司空縣入河船司空後省入華陰今隸華州班云渭水行千八百七十里

灞水出永興藍田縣終南山金谷東經臨潼縣北流入渭然長安志云灞水從上洛界入漢

澧水出永興藍田谷北入于灞

澧水出永興鄠縣終南山豐谷北至咸陽入渭

鎬水出鄠縣界至長安入清渠

斜

洸水出臨洸西羌中北至枹罕東入河

歷代封畛

臣謹按杜佑之序曰昔黃帝方制天下立為萬國易

稱首出庶物萬國咸寧及少皞氏之衰其後制度無

聞矣若顓帝之所建帝嚳受之創制九州統領萬國

雍荆豫梁冀至堯遭洪水而天下分絕使禹平水土

還為九州如舊制也舜攝帝位分為十二州雍荆豫

并青營故虞書云肇十有二州是也夏氏革命又為

九州塗山之會亦云萬國四百年間遞相兼并商湯

受命其能存者三千餘國亦為九州分統天下冀荆

揚充徐幽營營載祀六百及乎周初尚有千八百國

而分天下為九畿方千里曰王畿其外曰侯畿亦曰



又外曰甸畿又外曰男畿又外曰采畿又外曰衛畿

又外曰蠻畿又外曰夷畿要服也又外曰鎮畿又外

曰藩畿藩服也侯甸男采衛蠻夷鎮藩即九畿也各相去五百里為限至成王

時亦曰九州屬職方氏揚荊豫青兗雍幽冀并其後諸侯相并

有千二百國及平王東遷迄于獲麟之末二百四十

有二年諸侯擅兵征伐更相吞滅不可勝數而見於

春秋經傳者百有七十國爾百三十九國知土地所在其三十一國不知其

處也其蠻夷戎狄復不在其數逮乎下分地里上配天

象而所定躔次總標為一十二焉及周之末唯有七

國秦昭王時西周盡獻其地邑三十六口三萬受秦獻而歸其人至莊襄王滅東西周國七城而已秦

制天下為四十郡其地則西臨洮而北沙漠東縈南

帶皆臨大海漢興以秦地太大更加置郡國其後開

越攘胡土宇彌廣改雍曰涼梁曰益又置徐州復禹

舊號置交初為交趾後為交州北有朔方初為朔方後為并州凡為十三

州部刺史司隸并荆兗豫揚冀幽青徐益交涼而不常所治至哀平之

際凡新置郡國六十三與秦四十合百三縣邑千三

百一十四道三十二侯國二百四十一地東西九千

三百二里南北萬三千三百六十八里此漢之極盛

也後漢光武以官多役煩乃併省郡國十縣道侯四

百餘所其後亦為十三州部司隸治河南今河南府豫治



譙今鄆縣 兗治昌邑今魯郡金鄉縣 徐治郟郟音談今臨淮郡下邳縣 青治

臨淄今北海郡縣 涼治隴隴今天水郡龍城縣 并治晉陽今太原府 冀治

鄆許各反今趙郡高邑縣 幽治薊今范陽縣 揚治歷陽今郡縣 益治雒

昌今未郡 荆治漢壽今武陵郡武陵縣 交治廣信今蒼梧郡蒼梧縣 漸復

加置郡國至於靈獻凡百有五焉縣道侯國千一百

八十桓帝末興初有鄉三千六百八十二亭萬二千四百二十 東樂浪郡西燉煌

郡南日南郡北雁門郡西南永昌郡四履之盛亦如

前漢魏氏據中原有州十二司隸荆豫兗青徐涼秦

冀幽并揚雍分涼州置秦州治上邽今天水郡揚治壽春今郡徐治彭城今郡荆治襄陽今

郡兗治武威今郡餘並因前代 有郡國六十八東自廣陵文帝黃初六年親征

幸廣陵故城及旋師留張遼屯壽春母丘儉諸葛合

江都齊王嘉平後屬吳即今郡壽春誕皆鎮之 合

肥明帝青龍元年滿寵於合肥西北三十里築新城

置合肥南守襄陽西固祈山賊來輒破於三城之下者地有所必爭是也 沔口建安十五年

江夏太守鎮焉其後吳軍頻攻不拔青龍後屬吳即今漢陽郡 西陽黃初中滿寵令

郡襄陽建安二十四年徐晃守 重兵以備吳是時江

鎮兵之處更無人居明帝青龍中吳孫權遣數千家佃於江北為滿寵破之 西自隴西今

是南安將姜維來伐攻隴西南安皆不克 祈山明

太和二年蜀將諸葛亮攻祈山城漢陽 明帝青龍二

不亮來伐遣兵備 陳倉建安二十四年蜀將破夏侯

此即今天水郡陳倉 才於漢中遂令張郃守陳倉太

和二年諸葛亮以大衆攻之將軍郝昭以千人守亮

攻二旬餘不拔故城今在縣東二十里亮攻郿又不

通志地理略一

三



尅鄧故城在今縣東北十五里並今扶風鄧縣重兵以備蜀蜀全制巴蜀置

益治成都梁治漢中二州有郡二十二以漢中未破

夏侯妙才遂有漢中以魏延鎮興勢將軍王平守之

魏大將軍曹爽攻不白帝重鎮後主建興十五年吳

尅今洋川郡興道縣並為重鎮吳主北據江南盡海置交

治龍編今廣孫權置治番荆江陵郡郢即今江夏揚

安南府今丹五州有郡四十有三以建平武初破蜀

陽郡江寧縣孫皓天紀四年晉軍沿流來西陵建安

先主後得之孫皓不從今巴東郡襄陽陸遜為宜

伐守將吾彥請增兵皓將于禁等于襄陽陸遜為宜

四年蜀將關羽北討魏將于禁等于襄陽陸遜為宜

都守鎮此黃武初蜀先主來伐遜大破之後步闡陸

抗並鎮焉即樂鄉城後朱然修之戍焉晉王濬攻樂

今夷陵郡

鄉獲水軍督陸景平西將軍施洪南郡自建安末尅

以城降在今江陸郡松滋縣東關羽後蜀將

糜芳來降遂得之孫皓鳳皇元年督將伍延守此晉

軍平吳當陽侯杜元凱赴之斬伍延即今江陵郡也

巴丘建安十九年魯肅尅之孫皓寶鼎夏口建安十

權征黃祖尅之後遂置兵鎮孫皓天紀元年孫慎武

守之及晉平吳將軍胡奮赴於此即今江夏郡

昌孫權甘露元年城武昌陸遜諸葛恪鎮守及皖城

建安十九年孫權尅之赤烏四年今江夏郡是

未破

將軍王平守之

屯之遂為

十五年吳

郡

今

郡

郡

郡

郡

郡

郡

郡

郡

郡

郡

郡

郡

郡

郡

郡

郡



負疆境之守彼此不常纔得遽失則不暇存也今略

紀其久經屯鎮及要害之地焉其守將亦略紀其知名者餘不可偏舉他

亦類此 晉武帝大康元年平吳分爲十九州部置司州

治洛陽今河南府兗治廩丘今濮陽郡雷澤縣是豫治項今淮陽郡項城是

冀治房子今趙郡縣并治晉陽青治臨淄徐治彭城荆初

治襄陽後治江陵今揚郡初治壽春後治建業涼治武

威分三輔爲雍治京兆今分府隴山之西爲秦治上邽

今天水郡縣益治成都分巴漢之地爲梁治南鄭今漢中郡縣

分雲南爲寧治雲南今幽郡治涿今范陽郡范陽縣分遼東爲

平治昌黎今安東府交治龍編今安南府分合浦之北爲廣治

番禺又增置郡國二十有二凡州百五十有六縣千

一百有九以爲冠帶之國盡秦漢之士及永嘉南渡

境宇殊狹九州之地有其二焉初元帝命祖逖鎮雍

丘建武初逖北伐便屯雍丘今陳留郡縣逖死北境漸蹙大興四年逖死於是

荆豫自淮南北今汝南汝陰南陽等郡以北青兗四州今東萊東牟高密北海淄川濟南等

郡之及徐州之半今彭城琅邪等郡陷劉曜石勒以合肥戴

思鎮淮陰劉隗鎮守即壽陽祖約鎮守後又陷於石

壽春泗口劉遐鎮守即臨角城安帝義熙中置爲

重鎮成帝時鄴守將退屯襄陽咸和初魏該屯鄴爲

退守襄陽後亦陷石勒尋復之庾翼朱序皆鎮而

於此又爲苻堅將苻今所陷尋又復之即今郡穆帝

通志地理



時平蜀漢永和三年桓温西討擒李勢復梁益之地梁州則漢川益則蜀川是

又遣軍西入關至灞上十年桓温討符健於今京兆北府萬年縣白鹿原戰敗再

北伐一至洛陽永和十二年桓温討燕慕容雋大破其將姚襄於伊水時襄已降一

至枋頭廢帝太和二年桓温又討慕容暉敗還今汲郡衛縣界枋音方所得郡縣軍

旋又失洎苻堅東平慕容暉太和五年西南陷蜀漢西北

剋姑臧孝武太和五年平張天錫今武威郡則漢水長淮以北悉為堅

有及堅敗太和八年再復梁九年將郭寶平梁州益蜀郡太守任權

益州平史李平青徐兗豫司之地其後青兗陷於慕容德安

隆安三年德據之殺幽州刺史辟隆安三年德據之殺幽州刺史辟豫司陷於姚興隆

三以彭城為北境藩扞朱序鎮守後益梁陷於譙縱義熙初陷

每因劉石苻姚衰亂之際則進兵屯戍在於漢中襄

陽彭城然大抵上明今江陵郡松滋縣江陵夏口武昌合肥

壽陽淮陰常為晉氏鎮守其刺史所治皆置州兵雖有不經攻圍互是重鎮守

皆類義熙以後又復青兗司豫梁益之地而政移於

宋矣武帝北平廣固時晉安帝義熙六年平慕容超得青州之地廣固即今北海

西定梁益九年朱齡石平譙縱又剋長安十三年親征平姚泓盡得河南

之地長安尋為赫連勃勃所陷至廢帝榮陽王景平

中武牢以西復陷後魏今大較以孝武大明為正凡

二十有二州揚治建業南徐治京口今丹陽郡丹徒縣徐治

彭城南兗治廣陵兗治瑕今魯郡縣南豫治歷陽荆治汝



南今汝南郡江治尋陽今郡青治臨淄初治歷城今

汝陽縣治廣固後又移治臨淄即今縣是冀治歷城司治義陽荆治南郡郢

治江夏今湘治臨湘雍治襄陽今梁治南鄭秦

亦治南鄭益治成都今蜀寧治建寧今雲廣治南海

交治龍編越治臨鄣今合浦郡自東晉成帝時中原

僑立州郡以撫其民中間併省廢置離合非一郡凡

二百三十有八縣千一百七十有九初文帝元嘉中

遣將北伐水軍入河剋魏碭滑臺虎牢洛陽四城

碭即今濟陽郡城滑臺今靈昌郡城虎牢今其後

又失又分軍北伐西軍剋弘農開方二城並今弘以

東攻滑臺不剋而平碭守之尋皆敗退元嘉二十

農聞方及玄謨敗亦棄而遁於是後魏主太武總

師經彭城臨江屯於瓜步今廣陵郡退攻盱眙不拔

而旋臧質守之魏師攻圍三明帝時後魏又南侵淮

北青冀徐兗四州及豫州西境悉陷沒秦始皇二年徐

都引魏軍自是沈文秀東陽城崔道固歷城並為魏

魏懸瓠今汝南郡域則長淮為北境僑徐兗於淮南淮陰立兗

州立青冀二州寄治贛榆今東海郡東海其後十年

餘而宋亡然初疆盛也南鄭襄陽懸瓠元嘉二十六年

武率兵攻圍汝南太守陳憲等距四彭城歷城東陽



營陽王景平初竺夔鎮守後魏攻圍數旬不剋即今北海郡治東城皆為宋氏藩扞齊

氏淮北之地所以全少青州治朐山今東海郡冀治

渦口今臨淮郡豫治壽春北豫州自東晉以後或治淮南或治淮北不常其所

今舉其要北兗治淮陰北徐治鍾離又置巴東治巴

害之地今雲南郡其餘州郡悉因宋代州二十有三郡三百九十

有五縣千四百七十有四其後頻為後魏所侵至東

昏末元初河北諸郡相繼敗沒今南陽郡地又遣軍北伐

敗於馬圈退屯益城魏馬圈城去襄陽三百里時陳

師至敗還在今丹陽郡界又失壽春永元二年豫州刺史後三年

齊亡齊氏七主凡二十四年內難繁興始全盛也南

鄭明帝建武二年後魏大將元英來伐梁樊城今襄陽郡

安養縣建武中後魏主孝文率兵襄陽義陽壽春高

十萬數旬攻圍將曹虎拒守不下帝

遣垣崇祖鎮之謂曰兵衝要地宜備魏帝

師俄而魏將王肅以大軍來攻敗而歸淮陽角城明

初後魏南侵以漣口朐山為重鎮梁氏州郡多沿舊

李安仁戍之制天監中州二十有三郡三百五十縣千二十有五

其後更有析置大同中州百有七郡縣亦稱於此自

侯景逆亂建康傾陷墳籍散逸不可得而詳焉初武

帝受禪數年即失漢川及淮西之地天監三年梁州刺史夏侯道遷

以本部叛降後魏自劔閣以北並陷沒又魏將元英破將軍馬仙琕於義陽失地其後諸將

頻年與魏軍交戰於淮南淮北互有勝負自天監四年以後將



張惠紹剋魏宿遷城韋獻剋合肥裴邃雖得懸瓠彭

剋翟丘城胸山城尋皆敗唯合肥獨存

城俄而又失天監六年魏軍主白早生豫州刺史胡

以彭城並內屬又剋壽春普通七年將夏侯元植

無何悉復於魏又剋壽春等剋之獲魏揚州刺史李

鎮相次剋平直至洛陽暫為梁有大通元年魏將爾

少主魏朝大亂遣將陳慶之率軍送元顥為魏主入

河陽六旬五日渡河守北中府城數日爾朱榮來攻

數日顥敗慶之亦奔退所得之地尋其後又復漢中

亦失之中府地即今河陽北城是

南地降逆亂相尋有名無實及景平後江北之地悉

陷高齊漢川蜀川没于西魏太清初侯景以十三州

來降旋為東魏將慕容

紹宗所敗二年景舉兵反圍建康陷之及景平後元

帝承聖初齊將辛術南伐盡取淮南江北之地得傳

國璽反于齊三年西魏將達奚武陷漢

州下差音戍漢東郡棗夏口白苟堆大抵雍州襄

南境守將雄曰白苟堆梁之北面硤石城今汝陰郡

重鎮請備之在今汝南郡真陽縣

合州即合鍾離將康絢淮陰胸山為重鎮天監三年

柴慶宗以角城十一年東莞陳氏比於梁代土宇彌

太守劉晰以胸山並降入魏

蹙西不得蜀漢北失淮肥以長江為境文帝天嘉初

周軍所陷二年侯瑱剋平之湘川今

有州四十有二

地轉狹而州益多暨後州郡

郡百有九縣四百三十

有八宣帝大建中頻年北伐諸將累捷盡復淮南之

道志地理卷一



地將吳明徹於壽春更經略淮北大破齊軍於呂梁

及旋師屬高齊國亡又總軍北伐至呂梁周軍來拒

又大破之自大建五年北伐七年破齊軍九年又破

胸旋為周軍所敗悉虜其眾時梁士彥守彭城明徹

全軍沒於清口自是江北之地盡沒于周又以長

江為界十二年周大將司馬消難以淮西地來及隋

軍來伐遣將守狼尾灘後主禎明二年威昕守荆門

亦宜都界安蜀城將顧覺鎮之公安將陳紀鎮之

巴陵已下並風靡退散信州道大總管清河公楊素

相繼而破信州隋軍自採石虎襲陷之京口賀若弼

即今雲安郡也

渡江而平之後魏起自北方至道武率兵下山東攻

拔慕容寶中山今博陵郡遂有河北之地於是遷都

平城今雲中郡慕容氏喪敗遣將南略地至于滑臺許昌

今穎川郡彭城明元帝太恒中始於滑臺許昌置兵鎮守

道武天興中長孫肥等剋滑臺太武帝時又得蒲阪

今河東郡長安統萬始光中遣軍伐赫連昌剋蒲阪及長

連所都今神麴中宋師來伐碯礮今濟陽郡滑臺虎牢

今河南府汜水縣是戍將皆不守尋並復之神麴三年宋將到

滑臺虎牢洛陽遣安頡太延以後東平遼東西平姑

叔孫建等擊敗走之於於是西至流沙東接高麗所

臧三年東伐馮氏五年



未得者漢中及南陽懸瓠彭城青州之南而已其後

帝自南征遂臨瓜步宋淮北城鎮守將多有敗没

真君十二年因宋將王玄謨來侵剋礪礪城戍將濟州刺史王買得棄城而走宋師至滑臺敗帝乘勝至

江獻文天安初自河之南長淮之北皆為魏有

安王子勛之亂遣將慕容白曜略地破宋將沈文秀畢眾敬薛安都崔道固常珍等遂有其地孝文

遷都洛陽太和十九年徙都頻歲親征皆渡淮沔

十一年屯新野及樊城宣武初又得壽春景明初齊將裴叔業以壽春來降後至明

帝孝昌二年又陷入梁續收漢川至於劔閣兼得淮西之地

初梁將夏侯道遷以漢中降又元英破梁將馬仙琕於義陽遂有其地莊帝時梁軍洛

陽數旬敗走永安初因爾朱榮害胡太后少帝爾後

內難相繼不暇外略三四年後分為東西魏矣皆權

臣擅命具周齊事中自永安末年爾朱世隆稱兵入洛圖

籍散亡不可詳紀今按舊史云管州百十有一郡五

百十有九縣千三百五十有二按魏收史所載州郡是東魏靜帝武定中

其時洛陽以西及關中梁益之地悉屬西魏收猶總而編之自太武以後漸更疆

盛東征西伐剋定中原屬宋明以後及于齊梁國土

漸蹙自守不暇雖時有侵掠而退不旋踵故魏之城

鎮少被攻圍因利進取不常所守也北齊神武東魏

天平末大舉西伐至蒲津靜帝天平四年三道伐西魏齊神武自總大眾至蒲

津竇泰自風陵濟河至潼關高敖曹入武關陷上洛以秦軍敗沒並旋師風陵在潼關北岸相對西



魏乘勝攻陷陝州周文帝率李弼等東征下陝神武

西至沙苑其年冬大敗而歸今馮翊郡界西軍又乘勝襲陷洛陽西魏

將獨孤如願據金墉明年西師又至于河陰今洛陽縣北時拒守河

陽城潘相樂守北城即舊城高永樂守西師敗歸大

元年周文帝親征敗還如願亦棄金墉遁走神武遂毀其城其後神武攻圍西魏

玉壁不剋興元四年西魏將王思政守之今絳郡稷山縣西師來伐至于邙

山武定初周文帝親征神武禦之敗殺周將王雄後神武又圍玉壁不剋武定

四年西魏將文襄遣將圍潁川拔之自武定五年冬

韋孝寬守之月城於是河南自洛陽之西河北自晉之西今平陽郡悉

入西魏文宣之世命將略地南際于江矣天保二年屬侯景亂

梁遣辛術南討遂得傳國璽又過江得梁夏口後二國通和旋師矣武城河清中築戍

於軹關河清二年遣斛律光築其年周軍至洛陽敗

還晉公護統軍將楊後主武平中陳軍來侵盡失淮

南之地武平五年以後陳將吳明徹頻歲周師攻拔

河陰大城周武親征後主隆化末西師攻拔晉州今

陽因之國滅齊都於鄴自東魏之後天下三分梁陳

有江東宇文有關西高氏據河北有州九十有七郡

百六十縣三百六十有五文宣天保七年已併省州

十九鎮二當齊神武之時與周文帝抗敵十三四年



統師親征諸將攻戰則不復紀自文宣之後纔守境而已大抵西則

姚襄城今文城郡西城姚襄所築西臨黃河控帶龍門之險周齊交爭之地後主武平二年大將

斛律光破周兵於此遂立鎮焉洪洞今平陽郡縣北故城控據要險崇化末周師既剋晉州其城主

張元靜以晉州武平關三關並今絳郡界栢崖城侯景所都正平縣界

西軹關河陽南則虎牢陸子章增築城守洛陽北荆門今陸渾縣

東北故孔城防今伊闕縣東汝南郡今臨汝郡魯城

今汝南郡魯山縣東北置兵以防周寇自洛陽之南襄城汝陰汝南以北皆齊有及

陳師侵軼數歲齊亡南境要害未遑制置也周文帝

西魏大統中東魏師至蒲津文帝大統二年齊神武親征至蒲津以竇泰死

退文帝東征剋陝州兼得宜陽郡郟郡郟郡今絳郡常縣宜陽郡

今福昌郡東師又至沙苑其年冬齊神武親征大敗走後文帝東征至

河陰先勝後敗大統四年殺魏將高敖曹也築城於玉壁大統八年

思政築之齊神武攻圍不剋至十二年文帝又至邽

山先勝後敗大統九年得梁雍州十六年梁雍州刺史岳陽王詒舉州內附廢

帝初剋平漢中自梁侯景逆亂遣將達奚武剋之又遣軍平蜀將尉遲迴

之文帝西征至姑臧後又平江陵齊王廓後元初于謹平之殺梁元帝

自是疆理西有姑臧西南有全蜀南至于江矣明帝武成

二年將賀若敦剋陳湘州之地三年失之今澧陽武陵長沙衡陽等地是其河南自洛陽

之東之北河東自平陽之界屬于高齊至武帝建德

中東征拔齊晉州城尋又東征破齊師於晉州城下



建德五年攻拔晉州使梁士彥守之齊後主來攻三旬餘不拔六年又破齊後主軍乘勝平齊

後遣軍破陳軍於呂梁將王軌破陳將吳明徹悉虜其衆也其東南之

境盡于長沙通計州二百十有一郡五百八縣千二

十有四當全盛戰爭之際則王壁初王思政守後韋孝寬守東軍攻不拔遂置邵郡齊子嶺今王屋縣東二十里周齊分界處通洛防故函關城

武帝保定中改名黃櫨三城今永寧縣西北宜陽郡陝州土

剡今長水郡西三荆將獨孤信略定北荆州今即伊陽縣東荆州後改曰淮州今淮

安郡荆州三鷓鎮今汝州魯山縣西南名平高城置兵以備東軍隋

文帝開皇三年遷都大興城即今遂廢諸郡以州治

民自三代以前為九州兩漢加置十三州晉宋之後分析漸多至于魏齊後周雖割據鼎立天下分裂

其於州郡乃倍兩漢之地隋氏以官繁民弊遂廢五百餘郡而以州治民名則因循職事同於郡守無復

刺舉之任自九載廓定江表尋以戶口滋多析置州縣煬

帝大業初移洛陽城即今又征林邑更置三州既而

併省諸州三年改州為郡乃置司隸刺史分部巡察

本史不分別所置諸郡五年平定吐谷渾更置四部大凡郡百

九十縣千二百五十五東西九千三百里南北萬四

千八百一十五里東南皆至于海西至且末隋氏西境唯得

今燉煌郡以北至五原即今九原郡按隋氏北境唯至于河隋氏之盛

蓋極於此矣及唐高祖武德初又改郡為州太守為

刺史其邊鎮及襟帶之地置總管府以領軍戎至七



年改總管府為都督府自因隋季分割州府倍多前  
代貞觀初并省州縣始於山河形便分為十道一曰  
關內道二曰河南道三曰河東道四曰河北道五曰  
山南道六曰隴右道七曰淮南道八曰江西道九曰  
劍南道十曰嶺南道既北殄突厥頡利西平高昌東  
西九千五百十里南北萬六千九百十八里高宗平  
高麗百濟得海東數千餘里旋為新羅靺鞨所侵失  
之又開四鎮即西境拓數千里至于闐疎勒龜茲焉  
者諸國矣景雲二年又分置二十四都督府分統諸  
州時議以權重不便尋罷之開元二十一年分為十

五道置採訪使以檢察非法京畿治西京城內都畿治東

關內多以京官遙領河南治陳留郡河東治河東郡河北治魏郡隴右治西

平郡山南東治襄陽郡山南西治漢中郡劍南治蜀郡淮南治廣陵郡江

南東治吳郡江南西治豫章郡黔中治黔中郡嶺南治南海郡又於邊

境置節度經略使式遏四夷節度使十經略守捉使三大凡鎮兵

四十九萬人戎馬八萬餘匹每歲經費衣賜則千二

十萬疋段軍倉則百九十萬石大凡千二百十萬開元

天寶每歲邊用不過二百萬其地東至安東都護府西至安西都

護府南至日南郡北至單于都護府南北如前漢之

盛東則不及西則過之漢之東境有樂浪郡西境有燉煌郡今東極安東府則漢

道志地理各一



遼東郡也其漢之玄菟樂浪二郡並在遼東郡之東今悉為東夷之地矣今西極安西府其伊吾交河北庭安西則漢代戎胡所據皆未得而詳九州之區域在昔顓帝及于陶

唐分而為九其制最大顓帝置九州堯時洪水使禹治木還為九州舜分為十二

州夏商並為九州按周之本制起於顓帝辨其疆界始於禹貢今分別地里故以為首雍州西

據黑水東距西河黑水今張掖郡西河則龍門之河今京兆華陰馮翊扶風汧陽新平

安定彭原安化平涼靈武五原寧朔洛交中部延安咸寧上郡銀川新秦朔方九原榆林安北天水隴西

金城會寧安鄉臨洮和政寧塞西平武威張掖酒泉晉昌墩煌等郡也豫州西南至荆

山北距河荆山在今襄陽郡南其北境至于河今河

陽濟陰譙郡潁川淮陽汝陰汝冀州唐虞之都以餘

州所至則是其境西境雍州南境豫州東境兗州皆以河為界河自今文城絳郡西龍

門南流至華陰東過今汲郡黎陽縣東大岬山又東入于海今河內汲郡鄴都廣平鉅鹿信都趙郡常山

博陵河間文安饒陽上谷范陽順義歸化歸德媯川漁陽密雲北平柳城河東絳郡陝郡之北境平陽高

平上黨樂平陽城大寧文城西河太原昌化兗州舊樓煩雁門定襄安邊馬邑雲中單于等郡地

為濟河之閒孔安國云東南據濟西北距河今靈昌濮陽濟陽東郡清河魏郡博平東平平

原樂安景城青州東北據海西距岱岱泰山也今在魯郡界自泰山

等郡地是也之東至于海今北海濟南淄川徐州東據海北至岱

東萊東牟高密安東等郡是也

南及淮自泰山之南淮之北海之西也今彭梁州東

據華山之陽西距黑水華山之南今華陰之西南黑

蜀之地皆是也今上洛漢中洋川安康房陵通川瀘山南平涪陵南川瀘川清化始寧成安符陽巴川南

賓南浦閩中南充安岳盛山雲安犍為陽安仁壽通義和義資陽南溪河池武都同谷順政懷道同昌陰







今常山趙郡之東北境博陵之西境鉅鹿之北境  
 饒陽之南境兼兗州之域今清河景城之南境是  
**陽**冀州之域今漁陽右北平冀州之域今北  
 密雲郡地皆是也  
 之域今柳城及北遼東青州之域今河東冀州之域  
 平郡之東境皆是也  
 郡陝郡之北境平陽上黨冀州之域今上黨高  
 大寧文城等郡是也  
 冀州之域今太原西河昌化定代郡冀州之域今安  
 襄雁門之南境樓煩等郡是也  
 是雁門冀州之域今雁門郡之  
 也  
 及雍州之域東郡兗州之域今靈昌濮陽濟陽魏郡  
 榆林郡是也  
 是齊郡兗州之域今平原樂安及青州之  
 也  
 今魯郡東琅瑯青州之域今高密及徐  
 海郡是也  
 城臨淮漢中梁州之域今漢中洋川巴郡今通州之域  
 郡是也  
 安房陵郡地皆是也

山南平涪陵南川瀘川清化始寧咸安符陽巴川南  
 賓南浦閩中南充盛山雲安及安岳郡之東境皆是  
**蜀郡**梁州之域今巴西普安梓潼遂寧益昌會稽揚  
 之域今晉陵吳郡餘杭會稽餘姚東陽信安縉雲  
 臨海永嘉及丹陽之東境兼吳興郡之東境是  
**中**揚州之域今建安長樂清南郡荆州之域今江陵  
 源漳浦臨汀郡地皆是也  
 水安陸齊安漢陽江夏及長沙荆州之域今長沙巴  
 荆州之域襄陽郡地皆是也  
 陽連山邵黔中荆州之域今武陵澧陽黔中寧  
 陽郡地是也  
 南越之域今南海始興義寧海豐恩平南陵臨賀高  
 要感義晉康臨封開陽高涼連城新興銅陵懷德揚  
 州之域今潮**桂林**南越之域今始安平樂蒙山開江  
 陽郡皆是也  
 林象郡龍城融水朗寧懷澤寧仁合象郡南越之地  
 浦橫山循德龍池未定郡地皆是也  
 潘浦寧陵水南昌定川寧越安南武義龍水忻城九  
 真福祿文陽日南承化玉山合浦安樂海康温水湯



泉郡其餘郡府自漢已後歷代開拓四夷之地右今隴  
 皆是武威張掖西平寧塞酒泉晉昌燉煌伊吾交河北庭  
 安西武都臨洮懷道合川山南西道順政劍南道捷  
 為陽安安岳之西境仁壽通義和義資陽南溪同昌  
 陰平油江文川通化臨翼江源歸城靜川蓬山恭化  
 雞川雲山越嶲雲南洪源黔中道涪川播川夜郎義  
 泉漆溪嶺南道臨潭扶南正平樂古朱崖昌化延德  
 瓊山萬安郡地皆是爰自漢代至于有隋或郡國參置或年代  
 短促州郡無常增省而離合不一疆理難詳

開元十道圖

臣謹按唐開元十道圖其山川之所分貢賦之所  
 出得禹貢別州任土之制遠不畔古近不違令載  
 之六典為可書也



山在河南告成縣東嶽泰山一  
大川有伊洛汝潁沂

泗之水淮濟之瀆伊出河南伊陽縣北流入洛洛出

水在汝州潁水在潁州沂泗二水並出兗州淮厥賦

水源在唐州桐柏縣濟水源在河南濟源縣綃綿布陝許汝潁州並以絹及綿厥貢紬絕文綾

絲葛水葱蓆心席瓷石之器鄭汴許陳亳宋曹濮鄆

穎徐三州紬絕僊滑二州方紋綾豫州鷄鵝綾雙絲

綾著草碁子穎州綿兗州鏡花綾齊州絲葛綿兗齊

等州防風青州仙紋綾鄭州麻黃許州蓆心蓆登州

水蔥蓆陝州括萋根柏子仁曹州蛇牀子濟州阿膠

泗州貲布沂兗等州紫石英萊登密等州牛黃登州  
文石器海密等州布海州楚布萊州石器河南府瓷  
器遠夷則控海東新羅日本之貢獻焉三曰河東道  
古冀州之境今太原潞澤晉絳蒲虢汾慈隰石沁儀



嵐忻代朔蔚雲號州或屬河南凡十有九州焉東距恒山西

據河南抵首陽太行北邊匈奴恒山太原之東河水經嵐石隰慈絳蒲六

州之西境首陽在蒲州南太行在澤州南其名山則有雷首介山霍山崞

山雷首在蒲州介山在汾州霍山在其大川有汾晉

及丹沁之水汾水出忻州歷太原汾晉絳蒲五州入

沁水出沁州歷晉絳厥賦布繡蒲州調以繡餘厥貢

澤三州至懷南入河厥賦布繡蒲州並用麻布厥貢

趙扇龍鬚席墨蠟石英麝香漆人蔘太原龍骨甘草

蠟人蔘花蜜兔絲子澤州白石英野雞禹餘糧晉州

蠟絳州防風蒲州龍骨竹扇號州硯瓦地骨白皮

汾州石膏慈州蠟隰石二州胡女布晉汾二州龍鬚

席儀澤潞等州人蔘嵐號忻等州麝香忻州豹尾代

州熟青熟綠朔代二州白四曰河北道古幽冀二州

鷗翎蔚州松子雲州鷗翎

之境今懷衛相洛邢趙恒定易幽莫瀛深冀貝魏博

德滄棣媯檀營平安東凡二十有五州焉其幽營安

東並於海南迫于河西距太行恒山北通渝關薊

州海在棣滄幽平營五州之東河水經懷衛相魏博

門德棣七州之南境太行在懷州北恒山在定州西

渝關在平州東其名山有林慮白鹿封龍井陘碣石

薊門在幽州北林慮在相州西白鹿在衛州北封龍

之山恒嶽在焉在趙州西井陘在恒州西碣石在營

州東恒山北嶽漳水出潞其大川有漳淇呼沱之水漳水出潞

邢冀滄入海淇水出衛州與清水合歷魏貝德滄厥

賦綃綿及絲相州調兼以絲厥貢羅綾平紬絲布綿

紬鳳翽葦席墨恒州貢春羅孔雀等羅定州兩窠紬

綾懷州牛膝洛博魏等州平紬邢州



瓷器魏州綿紬衛趙莫冀等州綿瀛深冀德棣等州  
絹相州紗鳳翻席胡粉邢州絲布恒州羅定州紬綾  
幽州范陽綾貝州白氈滄州葦席柳箱媯營歸順等  
州麝香檀州安東府人蔘平州蔓荆子薊州鹿角膠  
易州墨燕州墨豹尾 遠夷則控契丹奚靺鞨室韋之  
安東單于野馬皮

貢獻焉五曰山南道古荆梁二州之境今荆襄鄧商

復郢隨唐峽歸均房金夔萬忠已上十六州梁洋集

通開壁巴蓬渠涪渝合鳳興利閬果已上凡三十有

三州焉東接荆楚西抵隴蜀南控大江北據商華之

山江水自蜀歷渝涪忠其名山有嶓冢熊耳巫峽銅

梁荆山峴山嶓冢在梁州金牛縣熊耳在商州上洛

縣峴山在襄州襄陽縣大川則有巴漢沮洳之水巴

在合州界入江漢水源出梁州金牛縣初名漾水一  
名沔水歷洋金均襄郢荆復七州至沔州入于江沮  
水源出房州末清縣至荆州厥賦綃布綿紬梁利隨  
界入江涪水出鄧州南入漢厥賦綃布綿紬均荆襄  
雜用綿絹合州調以綿厥貢金漆蜜蠟燭鋼鐵芒消  
紬餘州並調以麻布

麝香布交梭白穀細紵綾葛綵綸蘭干利州貢金網

穀子方穀紋綾襄州漆隱起庫路真鄧利果等州絲

布襄均房商等州麝香復郢開等州白紵隨州綾唐

州絹峽州芒消歸州紵麻布金州麩金萬州金忠州

蘇薰席梁州燕支紅花洋州白交梭壁巴蓬通忠渠

等州綿紬集通合等州白藥子通州絳香渠州買子

木并子漳州連頭獠布渝峽隨等州葛合州牡丹皮  
閩州重蓮綾襄州白穀鳳州蠟燭巴州蘭干布房州  
紵襄州烏漆碎石文漆器白綸中興鳳集夔等州蜜  
蠟  
六曰隴右道古雍梁二州之境今秦渭成武洮岷  
疊宕河蘭鄯廓已上涼甘肅瓜沙伊西北庭安西已上



河凡二十有一州焉其秦梁鄯洮北庭安西甘岷又管羈縻州東接秦州

西逾流沙南連蜀及吐蕃北界朔漠流沙在沙州已北連延數千里

其名山有秦嶺隴坻西傾朱圉積石合黎崆峒三危

鳥鼠同穴秦嶺在秦州上邽縣隴坻在清水縣西傾在洮州之西南朱圉在秦州伏羌縣積石在河州枹罕縣合黎在甘州張掖崆峒在肅州其大

川則有洮水弱水羌水洮水出西羌中歷岷蘭二州界入河弱水在甘州刪丹縣

羌水歷宕武文三州之界河瀆及休屠之澤在焉河水歷廓河鄯蘭等州界休屠

州界厥賦布麻厥貢麩金礪石碁石密蠟蠟燭毛

毳麝香白氎及鳥獸之角羽毛皮革廓宕二州貢麩沙州碁石肅州礪石成州武州蠟燭洮州毛毳涼州

毼布甘肅涼瓜等州野馬皮西州白氎氎瓜州吉莫

皮伊州陰牙角胡桐律鄯川犛羊角野馬皮岷秦二

州龍鬚席犛牛尾鷗翎秦州芎藭肅州肉苁蓉柏朮

根瓜州草豉子比庭州速霍角陰牙角阿魏截根安

西緋氈罽砂陰牙角羴毛甘沙渭河蘭壘等州麝香

遠夷則控西域胡戎之貢獻焉七曰淮南道古揚州

之境今揚楚和滁濠壽廬舒蘄黃沔安申光凡一十

有四州焉東臨海西抵漢南據江北距淮海在揚楚二州東漢

在沔州淮水經申光壽濠楚五州北境入其名山有

海江水經沔黃蘄舒和揚六州南境入海

八公瀟大別霍山羅山塗山八公山在壽州壽陽縣大別山在壽州霍山縣

霍山一名天柱在舒州懷寧縣自漢以來為南嶽隋

文帝開皇九年以南衡山為南嶽廢霍山為名山羅

山在申州塗山其大川有滁肥之水巢湖在焉源出



州以純布綿麻安光二厥貢交梭紵絺孔雀熟絲布

青銅鏡揚州進青銅鏡莞席細紵廬州交梭申光二

州麻質純紵申州綿絹州貢紵紵葛楚州貢孔雀布和州紵練滁沔

二州麻質布蘄舒二州白紵布黃州紵質布烏蛇安

州青紵布壽廬光等州生石斛壽州葛布廬州貢熟

布八曰江南道古揚州之南境今潤常蘇湖杭歙睦

衢越婺台温明栝建福泉汀已上東道宣饒撫虔洪吉郴

袁江鄂岳潭衡永道邵澧朗辰錦施南溪敘思黔費

業巫夷播漆珍凡五十有一州焉黔中又管東臨海

西抵蜀南極嶺北帶江海水在蘇杭越台温栝泉福

潤常蘇七州八州之東江水經岳鄂江宣

之北入海其名山有茅山蔣山天目會稽四明天

台栝蒼縉雲金華大庾武夷廬山而衡嶽在焉茅山在潤

州丹陽句容二縣界蔣山一名鍾山在潤州江寧縣

天目在杭州於潛縣會稽在越州山陰縣四明在餘

姚縣天台在台州始豐縣栝蒼縉雲皆在栝州金華

在婺州大庾在虔州南康縣武夷在建州崇安縣廬

山在江州尋陽縣衡其大川有浙江湘贛沅澧之水

洞庭彭蠡太湖之澤浙江水有三源一出歙州一出

界入海湘水出桂州湘源縣北流歷永衡潭岳四州

界入洞庭贛水經虔吉洪三州界入彭蠡沅水歷沅

辰朗岳四州界入洞庭澧水源出澧州石門縣至岳

州界入洞庭湖洞庭在岳州巴陵縣界彭蠡湖一名

宮亭湖在江州尋陽縣界太厥賦麻紵潤州調火麻

湖在蘇常湖宣四州縣界厥賦麻紵餘州並以紵

布厥貢紗編綾綸蕉葛練麩金犀角鮫魚藤紙朱砂

水銀零陵香潤州方棊水波綾常州紫綸布兔褐蘇

梭衢婺二州藤紙綿越州吳綾建州蕉花練福州蕉

海蛤泉栝二州綿饒衡巫等州麩金犀角洪撫江潭

通志地理卷一



永州等葛蘇州白石脂白蛇牀子台州金漆乾薑甲  
 香江州生石斛鄂江二州銀永州石燕道州零陵香  
 澧州龜子綾五入簞朗州紵練辰錦二州光明砂水  
 銀溪錦二州朱砂常湖歛宣虔吉表岳道等州白紵  
 布施宣二州黃連宣州綺南州斑布思黔費  
 業溱珍等州蠟夷州蠟燭温台二州鮫魚皮遠夷則  
 控五溪之蠻九曰劔南道古梁州之境今益蜀彭漢  
 綿劔梓遂普資簡陵邛眉雅嘉榮瀘戎黎茂龍扶文  
 當松靜柘翼悉維雋姚凡三十有三州焉其黎戎瀘  
又管羈縻州靜柘翼東連牂牁西界吐蕃南接群蠻  
悉維五州並管羌夷北通劔閣劔閣在劔州普安其名山有峨眉青城鶴  
 鳴岷山峨眉山在嘉州青城在蜀州鶴鳴在蜀州其  
 大川有涪雒及西漢之水江瀆在焉涪水歷松龍綿  
梓遂合六州界

入江雒水出漢州什邡縣經益簡資瀘四州界入江  
 西漢水歷利閬果合四州界入江大江水自松州甘  
 松嶺經翼茂彭蜀益陵眉嘉瀘州調  
 戎瀘十州之界入山南道厥賦綃綿葛紵以葛紵  
 等布餘州皆用厥貢麩金羅綾綿紬交梭彌牟布絲  
 綿綃及紵布葛麩香羚羊犛牛角尾益蜀二州單絲羅益州高杼  
 州紵布彌牟布綿州雙紉梓州遂州樗蒲綾戎普瀘  
 等州葛叩劔嵩等州絲布龍雅眉嘉資等州麩金姚  
 茂扶靜文悉松維當柘翼等州麩香劔州蘇薰席晉  
 州天門冬煎榮州斑布黎州蜀椒龍州羚羊角當靜  
 柘等州當歸羌活松州狐尾悉州遠夷則控西洱河  
 當歸犛牛尾維州犛牛尾姚州金遠夷則控西洱河  
 群蠻之貢獻焉十曰嶺南道古揚州南境今廣循潮  
 漳韶連端康岡恩高春封辯瀧新潘雷羅儋崖瓊振  
 已上廣府管內桂昭富梧賀龔象柳宜融古嚴已上桂府管內容藤



義竇禺白廉繡黨牢巖鬱林平琴已上容府管內鬱林平琴二州復名

邕賓貴橫欽潯襄籠田武環澄已上邕府管內安南驩愛陸

峯湯長福祿龐已上安南管內凡七十州焉其五府又管羈

州麻東南際海西極群蠻北據五嶺其名山有黃嶺及

鬱水之靈洲焉黃嶺在廣州寶安縣靈洲在廣州南海縣鬱水之中其大川有

桂水鬱水桂水出桂州臨源縣歷昭富梧三州界入鬱水鬱水一名浪水歷藤梧封康端廣六

州界厥賦蕉紵落麻廣州等調以紵布端州調蕉布康封二州調以落麻布厥

貢金銀沈香甲香水馬翡翠孔雀象牙犀角龜殼鼈

鼈綵藤竹布融象二州貢金桂邕昭柳等五十餘州貢銀桂州銅盤連州細布鍾乳崖欽二

州高良薑廣州竺席生沈香水馬甲香龜鼈皮藤篋

廣州安南並貢龜殼循振二州五色藤盤振州斑布

食單安南及潮州蕉安南檳榔鮫魚皮翠毛愛龐等

州孔雀尾驩州象牙藥犀角金薄黃屑沈香漳潮等

州鮫魚皮甲香韶州竹子布岡州甲香詹糖香廣潮

高循峯邵等州及安南蚰蛇膽春韶瀧廣等州石斛

雷州絲電富州斑布白石英蒙州楚金古州蠟容州

朱砂銀欽州翡翠毛陸州玳瑁鼈皮翠毛甲香峯州

荳蔻福祿邵二州白蠟福祿

龐二州紫餅朮昆州桂心其遠夷則控百越及林

邑扶南之貢獻焉凡天下之州府三百一十有五而

羈縻之州蓋八百焉京兆河南太原為三都潞揚益

荆幽為大都督府單于安西安北為大都護府安南

安東北庭為上都護府涼秦靈延代充梁安越洪潭

桂廣戎福為中都督府夏原慶豐勝營松泚鄯西雅

瀘茂雋姓夔黔辰容邕為下都督府同華岐蒲為四

通志地理略一



輔州蒲新陝懷鄭汴魏絳為六雄州絳新號汝汾晉

宋許滑衛相洛為十望州汾新安東平營檀媯蔚朔

忻安北單于代嵐雲勝豐鹽靈會涼肅甘瓜沙伊西

北庭安西河蘭鄯廓疊洮岷扶柘維靜悉翼松當戎

茂雋姚播黔驩容為邊州四萬戶已上為上州陝汝

澤邠隴涇寧鄜坊戶號僊二萬戶已上為中州不滿為下

州凡三都之縣在城內曰京縣奉先同城外曰畿縣

又望縣有八十五焉同州馮州朝邑澄城白水郃陽

扶風陳倉陝州陝縣棹林陝石河北芮城號州閿鄉

湖城鄭州管城縣陽武新鄭滎澤汴州浚儀開封尉

氏雍丘宋州宋城滑州酸棗兗州金鄉許州扶溝汝

州梁縣徐州襄城蒲州河東桑泉安邑虞鄉汾陰猗

氏解縣絳州正平龍門夏縣聞喜翼城晉州臨汾洪

洞汾州隰城平遙介休潞州上黨懷州河內武德武

陟獲嘉魏州貴鄉魏縣昌樂頓丘元城相州滏陽洛

州末年冀州信都南宮瀛州河間深州饒陽益州成

都蜀縣郟縣新繁彭州九隴導江蜀州晉原青城漢

州雒縣潤州曲阿江寧常州晉陵蘇州吳縣杭州餘

杭越州會稽婺州金華荊州江陵襄州襄陽揚州江都揚子其餘則六千戶已上

為上縣二千戶已上為中縣一千戶已上為中下縣

不滿一千戶皆為下縣凡天下之戶八百一萬八千

七百一十口四千六百二十八萬五千一百六十一

開元二十二年數 百戶為里五里為鄉兩京及州縣之郭內

植農桑催

四家為隣五隣為保有長以相禁約凡男

調賦役

里正兼課



通志地理略一  
五  
女始生爲黃四歲爲小十六爲中二十有一爲丁六十爲老每一歲一造計帳三年一造戶籍縣以籍成于州州成于省戶部總而領焉

地理略第一



